




Broj: 02-05-15003-2/16
Sarajevo, 28.04.2016. godine

Na osnovu člana 26. i 28. stav 4. Zakona o Vladi Kantona Sarajevo ("Službene novine Kantona Sarajevo", broj: 36/14 - Novi prečišćeni tekst i 37/14 – Ispravka), Vlada Kantona Sarajevo na **41. sjednici održanoj 28.04.2016. godine**, donijela je sljedeći

ZAKLJUČAK

1. Utvrđuje se Prijedlog zakona o naučnoistraživačkoj djelatnosti.
2. Predlaže se Skupštini Kantona Sarajevo da u skladu sa Poslovníkom Skupštine Kantona Sarajevo donese Zakon iz tačke 1. ovog Zaključka.



Dostaviti:

1. Predsjedavajuća Skupštine Kantona Sarajevo
2. Skupština Kantona Sarajevo
3. Premijer Kantona Sarajevo
4. Ministarstvo za obrazovanje, nauku i mlade Kantona Sarajevo
5. Evidencija
6. Arhiva



Na osnovu čl. 12. tačka b) i 18. tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - ispravka, 3/96 - ispravka, 16/97, 14/00, 4/01, 28/04 i 6/13), Skupština Kantona Sarajevo, na sjednici održanoj _____ 2016. godine, donijela je

PRIJEDLOG

ZAKON

O NAUČNOISTRAŽIVAČKOJ DJELATNOSTI

DIO PRVI - OSNOVNE ODREDBE

Član 1. **(Predmet Zakona)**

Ovim zakonom utvrđuje se poseban interes Kantona Sarajevo (u daljnjem tekstu: Kanton) u oblasti nauke i tehnologije, osnovni principi naučnoistraživačke djelatnosti, sudjelovanje u ostvarivanju međunarodne naučnoistraživačke saradnje i ostvarivanje naučnoistraživačke saradnje u Kantonu i Bosni i Hercegovini, finansiranje naučnoistraživačke djelatnosti, formiranje Savjeta za nauku Kantona Sarajevo (u daljnjem tekstu: Savjet za nauku), informacioni sistem i vođenje evidencija u vezi sa obavljanjem naučnoistraživačke djelatnosti, opća pitanja u vezi sa osnivanjem naučnoistraživačkih instituta kao organizacionih i podorganizacionih jedinica visokoškolskih ustanova i naučnoistraživačkih instituta kao ustanova, prava i obaveze nadležnih organa u oblasti naučnoistraživačke djelatnosti, nadzor nad provedbom ovog zakona i druga pitanja od značaja za obavljanje naučnoistraživačke djelatnosti na području Kantona.

Član 2. **(Definicija naučnoistraživačke djelatnosti)**

- (1) Naučnoistraživačka djelatnost predstavlja sistemski stvaralački rad na usvajanju novih znanja s ciljem podizanja općeg civilizacijskog nivoa društva i korištenje tih znanja u svim oblastima društvenog i privrednog razvoja, uključujući i razvoj tehnologije i njihovu primjenu.
- (2) Naučni i tehnološki razvoj ima prioritetan značaj za razvoj Kantona i sastavni je dio međunarodnog, posebno evropskog naučnoistraživačkog prostora.

Član 3. **(Poseban interes za Kanton i ostvarivanje posebnog interesa)**

- (1) Naučnoistraživačka djelatnost je od posebnog društvenog interesa za Kanton.
- (2) Poseban interes i strateški ciljevi u naučnoistraživačkoj djelatnosti na području Kantona, u smislu ovog zakona, ostvaruju se, pored ostalog, putem:
 - a) stvaranja mogućnosti za intenzivni i usklađeni razvoj nauke i tehnologije;
 - b) stvaranja uslova za podsticanje naučnoistraživačkog rada koji je u funkciji tehnološkog, inovacionog i ukupnog društveno-ekonomskog razvoja;
 - c) utvrđivanja osnovnih principa koordinacije naučnoistraživačke djelatnosti;
 - d) povezivanja planova razvoja naučnoistraživačkog rada sa strategijom razvoja privrednih kapaciteta;

- e) međunarodne naučne saradnje;
- f) školovanja i usavršavanja novih generacija naučnika na visokoškolskim ustanovama u Kantonu, Bosni i Hercegovini ili inozemstvu;
- g) ostvarivanja saradnje naučnoistraživačkih i visokoškolskih ustanova sa odgojno-obrazovnim ustanovama i ustanovama iz oblasti kulture;
- h) unapređenja sistema naučno-tehnoloških informacija;
- i) razvoja istraživačke infrastrukture prema međunarodnim standardima;
- j) reinvestiranja u industrijsko istraživanje;
- k) realizacije naučnoistraživačkih programa u skladu sa Strategijom za razvoj nauke Kantona Sarajevo (u daljnjem tekstu: Strategija za razvoj nauke) i Bosne i Hercegovine;
- l) provođenja aktivnosti na popularizaciji nauke i naučnoistraživačkog rada.

Član 4. (Principi)

- (1) Naučnoistraživačka djelatnost zasniva se na principu povezanosti osnovnih, primijenjenih i razvojnih istraživanja.
- (2) Naučnoistraživačka djelatnost u Kantonu zasniva se na sljedećim principima:
 - a) slobodi i autonomiji stvaralaštva;
 - b) konkurentnosti naučnih programa i projekata;
 - c) primjeni međunarodnih standarda i međunarodnih mjerila kvaliteta u oblasti nauke;
 - d) decentraliziranom uređenju i policentričnom organiziranju u oblasti nauke;
 - e) javnosti rada i rezultata tog rada koji su podložni naučnoj i stručnoj kritici;
 - f) etičnosti naučnoistraživačkog osoblja;
 - g) saradnji s domaćim i međunarodnim institucijama u oblasti nauke i istraživanja;
 - h) povezanosti sa sistemom visokog obrazovanja i odgojno-obrazovnim ustanovama na svim nivoima;
 - i) zaštiti intelektualnog vlasništva, ljudskih prava, te lične i opće sigurnosti;
 - j) brizi za održiv razvoj i zaštitu okoliša;
 - k) potrebama privrednog i društvenog razvoja;
 - l) poticanju i uvažavanju specifičnih sadržaja od značaja za Kanton i BiH.

Član 5. (Sloboda naučnog rada i djelovanja)

Naučni rad ne podliježe nikakvim ograničenjima ili formalnim zahtjevima osim onih koji proizilaze iz poštivanja standarda i etičnosti u naučnoistraživačkom radu, zaštite ljudskih prava, zaštite lične i opće sigurnosti na radu, kao i zaštite okoline.

Član 6. (Rezultat naučnoistraživačkog rada)

- (1) Rezultati naučnoistraživačkog rada mogu biti:
 - a) naučni i stručni rad objavljen u referentnom naučnom časopisu;
 - b) naučna knjiga ili monografija;
 - c) originalni naučni ili pregledni članak;
 - d) naučni elaborat i izvještaj,
 - e) saopštenje ili rad objavljen u zborniku s naučnog skupa;
 - f) pozvano predavanje na naučnom skupu;

- g) objavljena naučna kritika ili polemika;
 - h) leksikografska ili enciklopedijska jedinica;
 - i) kartografska publikacija;
 - j) magistarski i doktorski rad;
 - k) nova sorta, patent, tehnička rješenja, nove metode, novi materijali te novi tehnološki postupak.
- (2) Rezultat naučnoistraživačkog rada mora sadržavati elemente originalnosti i inovacije, tj. novih spoznaja, novih znanja, novih naučnih pravila ili novih primjena.

Član 7.

(Ostvarivanje naučnoistraživačke djelatnosti)

- (1) Naučnoistraživačka djelatnost obuhvata i ostvaruje se povezivanjem osnovnog (fundamentalnog), primijenjenog (aplikativnog) i razvojnog istraživanja te osposobljavanjem kadra za obavljanje naučnoistraživačke djelatnosti.
- (2) Osnovno (fundamentalno) istraživanje podrazumijeva teorijski i eksperimentalni rad usmjeren ka novim spoznajama radi dobijanja naučno primjenjivih istraživanja sa dugoročnim ciljevima primjene.
- (3) Primijenjeno (aplikativno) istraživanje je stvaralački rad usmjeren ka dobijanju naučno primjenjivih rezultata.
- (4) Razvojno istraživanje je stvaralački rad zasnovan na rezultatima osnovnog i primijenjenog istraživanja i iskustava usmjeren na stvaranje novih odnosno poboljšanje postojećih tehnologija, proizvoda i procesa.
- (5) Osposobljavanje kadra za obavljanje naučnoistraživačke djelatnosti, u smislu ovog zakona, podrazumijeva podršku i stvaranje uslova za sticanje akademskih i naučnoistraživačkih zvanja odnosno sticanje novih i proširivanje stečenih znanja.
- (6) Naučnoistraživačku infrastrukturu čine objekti i oprema za obavljanje naučnoistraživačke djelatnosti (laboratorije, postrojenja, ispitne stanice, biblioteke, naučno izdavaštvo i drugo).

DIO DRUGI – PODRŠKA NAUČNOISTRAŽIVAČKOJ DJELATNOSTI

Član 8.

(Osiguranje finansijskih sredstava za naučnoistraživačku djelatnost)

- (1) Sredstva za podršku naučnoistraživačkoj djelatnosti u smislu ovog zakona osiguravaju se u godišnjem iznosu do 2% Budžeta Kantona te i iz drugih izvora u skladu sa zakonom.
- (2) Sredstva iz stava (1) ovog člana biće utrošena u skladu Strategijom za razvoj nauke, a 5% od izdvojenih sredstava iz stava (1) ovog člana namijenjena su za podršku projektima koji su od posebnog interesa za Kanton.
- (3) Vlada Kantona Sarajevo (u daljnjem tekstu: Vlada), na prijedlog ministra za obrazovanje, nauku i mlade Kantona Sarajevo (u daljnjem tekstu: ministar) uz prethodno pribavljeno mišljenje Savjeta za nauku, donosi odluku kojom se utvrđuju kriteriji za utrošak sredstava iz ovog člana.
- (4) Ministar prije utvrđivanja prijedloga odluke iz stava (3) ovog člana provodi konsultacije sa Savjetom za nauku.
- (5) Sredstva iz stava (1) ovog člana, izuzev sredstava rezerviranih u skladu sa stavom (2) ovog člana, koriste se za ulaganje u osposobljavanje kadrova za naučni i istraživački rad, usavršavanje naučnoistraživačkog osoblja, za razvoj i uvođenje nove

- naučnoistraživačke infrastrukture te poticanje naučnoistraživačkih i istraživačkorazvojnih projekata od interesa za Kanton i razvoj naučnoistraživačke djelatnosti u skladu sa ovim zakonom.
- (6) Za namjene iz stava (5) ovog člana sredstva se, u skladu sa odlukom iz stava (3) ovog člana dodjeljuju u postupku javnog oglašavanja od strane Ministarstva za obrazovanje, nauku i mlade Kantona Sarajevo (u daljnjem tekstu: Ministarstvo).
 - (7) Godišnji izvještaj o utrošku sredstava za razvoj naučnoistraživačke djelatnosti odobrenih u Budžetu Kantona u skladu sa ovim zakonom Ministarstvo podnosi Vladi.

DIO TREĆI – STRATEGIJA ZA RAZVOJ NAUKE

Član 9.

(Izrada i sadržaj Strategije za razvoj nauke)

- (1) U svrhu ostvarivanja strateških ciljeva, definiranja smjernica i prioriteta naučnog i tehnološkog razvoja Kantona i Bosne i Hercegovine, odnosno ostvarivanja posebnog interesa u naučnoistraživačkoj djelatnosti, donosi se i provodi Strategija za razvoj nauke.
- (2) Strategija za razvoj nauke predstavlja osnovu za podsticanje i realizaciju naučnoistraživačkog i istraživačkorazvojnog rada u Kantonu i donosi se svakih pet godina.
- (3) Strategija za razvoj nauke sadrži osnovne principe, ciljeve, smjernice i prioritete naučnog i tehnološkog razvoja, s posebnim osvrtom na:
 - a) ciljeve koji se u ovoj oblasti žele dostići na nivou Kantona;
 - b) naučna područja i uže naučne oblasti koje treba posebno razvijati i materijalno podržavati radi dostizanja ciljeva u razvoju Kantona i Bosne i Hercegovine;
 - c) prioritetne potrebe u naučnoistraživačkoj djelatnosti i prioritete ulaganja u naučnoistraživačke i istraživačkorazvojne projekte u narednom petogodišnjem periodu;
 - d) definiranje časopisa i publikacija čije je izdavanje od posebnog interesa za Kanton;
 - e) program podrške za naučnoistraživačku infrastrukturu;
 - f) program podrške za osposobljavanje kadra za naučnoistraživački i istraživačkorazvojni rad i za usavršavanje naučnika od interesa za Kanton;
 - g) ostale odrednice koje su od značaja u kreiranju strategije i politike u nauci i naučnoistraživačkoj djelatnosti (period ažuriranja i redefiniranja ciljeva koji se žele doseći u narednom petogodišnjem periodu, program razvoja sistema naučnih informacija i objavljivanja dostignuća naučnoistraživačke djelatnosti, program učešća u međunarodnim naučnoistraživačkim i istraživačkorazvojnim projektima i drugo).

Član 10.

(Izrada i usvajanje Strategije za razvoj nauke)

- (1) Nacrt Strategije za razvoj nauke priprema Savjet za nauku i dostavlja ga Ministarstvu.
- (2) Strategiju za razvoj nauke donosi Skupština Kantona Sarajevo (u daljnjem tekstu: Skupština) na prijedlog Vlade.

Član 11.
(Osnivanje i rad Savjeta za nauku)

- (1) S ciljem praćenja i unapređenja stanja u oblasti nauke i tehnologije u Kantonu osniva se Savjet za nauku kao stručno i savjetodavno tijelo Ministarstva.
- (2) Savjet podnosi Ministarstvu izvještaj o svom radu i stanju u oblasti naučnoistraživačkog rada na području Kantona najmanje jednom godišnje.
- (3) Ministarstvo može od Savjeta za nauku zatražiti dostavu određenih informacija ili stavova sa prijedlogom mjera za unapređenje stanja u oblasti naučnoistraživačkog rada ili u oblasti visokog obrazovanja i u kraćem vremenskom intervalu od roka utvrđenog u stavu (2) ovog člana.

Član 12.
(Imenovanje Savjeta za nauku)

- (1) Članove Savjeta za nauku imenuje ministar u roku od tri mjeseca od dana stupanja na snagu ovog zakona.
- (2) Za predsjednika Savjeta za nauku imenuje se kandidat sa zvanjem doktora nauka koji posjeduje iskustvo u multidisciplinarnim istraživanjima i međunarodno prepoznate reference i iskustvo u naučnoistraživačkoj djelatnosti i djelatnosti visokog obrazovanja.
- (3) Članovi Savjeta za nauku imenuju se na period od četiri godine, uz mogućnost ponovnog imenovanja.
- (4) Odlukom ministra o osnivanju Savjeta za nauku preciznije se utvrđuje sastav, mandat, prava, obaveze, naknada za rad te druga pitanja značajna za rad Savjeta za nauku.
- (5) Savjet se sastoji od devet članova i to:
 - a) osam članova istaknutih naučnih radnika sa akreditovane visokoškolske ustanove ili naučnog instituta registrovanog na području Kantona, pri čemu se vodi računa o zastupljenosti temeljnih naučnih oblasti;
 - b) istaknuti privrednik sa područja Kantona.
- (6) Predsjednika Savjeta za nauku imenuje i razrješava ministar, a članovi glasanjem određuju jednog od članova za zamjenika predsjednika Savjeta za nauku.
- (7) Mandat zamjenika predsjednika prati mandat predsjednika Savjeta za nauku.
- (8) Član Savjeta za nauku ne može biti rektor i prorektor univerziteta, dekan i prodekan organizacione jedinice univerziteta, direktor naučnoistraživačkog instituta kao ustanove i direktor visoke škole.
- (9) Članovi Savjeta za nauku imaju pravo na mjesečnu naknadu u zavisnosti od provedenih aktivnosti i ostvarenih rezultata na realizaciji poslova iz nadležnosti Savjeta za nauku.
- (10) Odluku o iznosu naknade donosi ministar.
- (11) Poslovníkom o radu utvrđuje se način rada, sazivanje sjednica, odlučivanje i druga pitanja bitna za rad Savjeta za nauku.
- (12) Administrativne poslove za potrebe Savjeta za nauku obavlja sektor za oblast visokog obrazovanja i nauke u sastavu Ministarstva.

Član 13.
(Nadležnost Savjeta za nauku)

Savjet za nauku je nadležan da:

- a) daje preporuke i mišljenja s ciljem razvoja, finansiranja i unapređenja stanja u oblasti nauke i tehnologije u Kantonu;
- b) izrađuje nacrt Strategije razvoja nauke;
- c) prati provođenje Strategije razvoja nauke u Kantonu i daje preporuke i mišljenja Ministarstvu prilikom donošenja provedbenih akata (akcioni planovi, smjernice i sl.);
- d) daje mišljenje o međusobnoj povezanosti Strategije razvoja nauke u Kantonu i Strategije za razvoj visokog obrazovanja Kantona Sarajevo i potrebi njihovog usklađivanja;
- e) vrši procjenu stanja u oblasti naučnog i istraživačkog rada i oblasti visokog obrazovanja te daje preporuke ministru u pogledu preduzimanja mjera i aktivnosti za unapređenje stanja u oblasti nauke i visokog obrazovanja u Kantonu;
- f) daje mišljenje u vezi sa strateškim pravcima budućeg rada i djelovanja visokoškolskih ustanova u oblasti naučnoistraživačkog rada i visokog obrazovanja;
- g) predlaže Ministarstvu aktivnosti u oblasti naučnoistraživačke djelatnosti i visokog obrazovanja;
- h) priprema i po zahtjevu ministra izrađuje nacрте strateških dokumenata i podzakonskih akata u oblasti nauke;
- i) priprema i Ministarstvu predlaže instrumente za statističko praćenje stanja u oblasti nauke i tehnologije u Kantonu;
- j) daje preporuke o učešću Kantona u programima Evropske unije iz oblasti nauke i tehnologije;
- k) daje preporuke u pogledu podrške projektima u oblasti nauke i tehnologije od posebnog interesa za Kanton;
- l) daje mišljenje u vezi sa ostvarivanjem međunarodne saradnje u oblasti nauke i tehnologije;
- m) daje preporuke u pogledu definiranja sistema naučnoistraživačkih informacija u skladu s međunarodnim standardima;
- n) obavlja i druge poslove koje mu povjeri ministar.

Član 14.
(Prijevremeno razrješenje)

- (1) Član Savjeta za nauku može biti razriješen i prije isteka vremena na koje je imenovan, i to:
 - a) u slučaju gubitka sposobnosti za izvršavanje obaveza člana Savjeta za nauku;
 - b) ako uredno i savjesno ne ispunjava obaveze člana Savjeta za nauku;
 - c) ako svojim djelovanjem i ponašanjem povrijedi ugled Savjeta za nauku;
 - d) na vlastiti zahtjev.
- (2) Obrazloženi prijedlog za utvrđivanje postojanja okolnosti za razrješenje predsjednika ili člana Savjeta za nauku ministru može podnijeti predsjednik ili tri člana.
- (3) Utvrđivanje postojanja okolnosti za razrješenje predsjednika ili člana Savjeta za nauku može pokrenuti i ministar.

Član 15.
(Nosioci naučnoistraživačke djelatnosti)

Naučnu i istraživačku djelatnost na području Kantona obavljaju:

- a) Univerzitet u Sarajevu sa organizacionim jedinicama;
- b) akreditovane visokoškolske ustanove kao ustanove sa organizacionim jedinicama registrovane na području Kantona;
- c) naučnoistraživački instituti kao ustanove registrovani na području Kantona;
- d) akademsko i naučnoistraživačko osoblje upisano u Registar iz člana 19. stav (7) ovog zakona;
- e) Akademija nauka i umjetnosti Bosne i Hercegovine.

Član 16.
(Postupak osnivanja)

- (1) Postupak osnivanja naučnoistraživačkih instituta kao organizacionih jedinica u okviru visokoškolske ustanove na području Kantona obavlja se na način i u postupku propisanim Zakonom o visokom obrazovanju.
- (2) Postupak osnivanja naučnoistraživačkih instituta kao ustanova vrši se na način propisan ovim zakonom.
- (3) Uslovi za osnivanje naučnoistraživačkog instituta iz st. (1) i (2) ovog člana propisani su ovim zakonom.
- (4) Osnivač naučnoistraživačkog instituta kao ustanove Ministarstvu podnosi zahtjev za osnivanje, uz koji obavezno prilaže elaborat o opravdanosti osnivanja, prijedlog statuta te dokaz o uplati sredstava u iznosu utvrđenom Odlukom Vlade za potrebe troškova vođenja postupka osnivanja od faze podnošenja zahtjeva do okončanja postupka po zahtjevu.
- (5) Elaborat o opravdanosti osnivanja naučnoistraživačkog instituta obavezno sadrži: podatke o osnivaču, sjedište i naziv, ciljeve, opis i preciznu razradu djelatnosti, detaljan opis djelokruga rada, kadrovsku i infrastrukturnu opremljenost i način obezbjeđenja finansijskih sredstava za početak i daljnji rad naučnoistraživačkog instituta.
- (6) Nakon dostavljanja urednog zahtjeva iz stava (4) ovog člana, Ministarstvo imenuje ekspertnu komisiju radi razmatranja zahtjeva i davanja stručnog mišljenja o usklađenosti elaborata u skladu sa odredbama ovog zakona.
- (7) Akt o imenovanju ekspertne komisije iz stava (6) ovog člana obavezno sadrži opis poslova i zadataka, rok za izvršenje povjerenih poslova i zadataka, kao i druga pitanja relevantna za rad.
- (8) U postupku osnivanja naučnoistraživačkog instituta kao ustanove podnosilac zahtjeva je obavezan ispred zvaničnog naziva instituta dodati odrednicu „Naučnoistraživački institut“.

Član 17.
(Rad ekspertne komisije i odluka Vlade)

- (1) Ekspertnu komisiju iz člana 16. stav (6) ovog zakona, koja broji najmanje pet članova, imenuje Ministarstvo iz reda istaknutih naučnih radnika i stručnjaka iz odgovarajuće

- naučne oblasti, predstavnika osnivača i predstavnika Ministarstva, uz prethodno pribavljeno mišljenje Savjeta za nauku u pogledu kompetentnosti članova komisije.
- (2) Izvještaj ekspertne komisije uz uredan zahtjev osnivača, Ministarstvo dostavlja Vladi, koja, u slučaju prihvatanja izvještaja i davanja saglasnosti na elaborat, zahtjev osnivača upućuje Skupštini na razmatranje i usvajanje.
 - (3) Odluka Vlade o elaboratu iz stava (2) ovog člana mora biti donesena najkasnije u roku od 60 dana od dana dostavljanja izvještaja ekspertne komisije Ministarstvu.
 - (4) U slučaju da je Vlada odbila dati saglasnost na elaborat zbog negativnog stručnog mišljenja ekspertne komisije, osnivač može tražiti da se imenuje posebna ekspertna komisija koja će ponovo razmotriti elaborat i razloge odbijanja davanja pozitivnog stručnog mišljenja od strane ekspertne komisije.
 - (5) U slučaju podnošenja zahtjeva za imenovanje posebne ekspertne komisije, osnivač je obavezan izvršiti uplatu dodatnih finansijskih sredstava za rad posebne ekspertne komisije i to u visini naknade koja je prethodno utvrđena za rad ekspertnoj komisiji.
 - (6) Akt o imenovanju posebne ekspertne komisije iz stava (4) ovog člana obavezno sadrži opis poslova u smislu ponovnog razmatranja elaborata i razloga odbijanja davanja pozitivnog mišljenja ekspertne komisije i Vlade, kao i rok za izvršenje povjerenih poslova.
 - (7) Izvještaj sa mišljenjem posebne ekspertne komisije, uz izvještaj sa mišljenjem ekspertne komisije, Ministarstvo dostavlja Vladi na razmatranje i odlučivanje.
 - (8) Protiv odluke Vlade nije dozvoljena žalba, ali se može pokrenuti upravni spor pred nadležnim sudom u Sarajevu u roku od 30 dana od dana prijema odluke.

Član 18.

(Odluka Skupštine i rad komisije matičara)

- (1) Odluka Skupštine o zahtjevu osnivača, mora biti donesena najkasnije u roku od četiri mjeseca od dana podnošenja Ministarstvu urednog zahtjeva iz člana 16. stav (4) ovog zakona.
- (2) Odluka Skupštine iz stava (1) ovog člana je konačna i putem Ministarstva dostavlja se osnivaču.
- (3) Nakon što Skupština donese odluku kojom se daje saglasnost za osnivanje naučnoistraživačkog instituta kao ustanove, osnivač imenuje komisiju matičara, čiji sastav treba biti u skladu sa odredbama ovog zakona koje se odnose na izbor u naučna i istraživačka zvanja, koja obavlja sljedeće poslove:
 - a) donosi statut;
 - b) objavljuje konkurs i vrši izbor u naučna i istraživačka zvanja u skladu sa zakonom;
 - c) objavljuje konkurs za izbor i imenovanje direktora;
 - d) objavljuje konkurs i vrši izbor članova upravnog i nadzornog odbora naučnoistraživačkog instituta kao ustanove;
 - e) preuzima ostale potrebne aktivnosti u procesu ispunjavanja uslova neophodnih za početak rada i daljnji rad naučnoistraživačkog instituta kao ustanove;
 - f) dostavlja osnivaču izvještaj o ispunjenosti uslova potrebnih za početak rada i daljnji rad naučnoistraživačkog instituta kao ustanove sa obrazloženim kalendarom aktivnosti i datumom početka rada.
- (4) Nakon što komisija matičara dostavi izvještaj da je izvršila zadatke iz stava (3) ovog člana, osnivač donosi akt o osnivanju naučnoistraživačkog instituta kao ustanove.

Član 19.

(Provjera ispunjenosti uslova od strane stručne komisije)

- (1) Uz zahtjev za provjeru ispunjenosti uslova za početak rada i nastavak rada osnivač naučnoistraživačkog instituta kao ustanove Ministarstvu dostavlja:
 - a) odluku Vlade i Skupštine o davanju saglasnosti na elaborat o opravdanosti osnivanja naučnoistraživačkog instituta kao ustanove;
 - b) odluku osnivača o osnivanju naučnoistraživačkog instituta kao ustanove;
 - c) usvojen statut;
 - d) dokaz da ima najmanje deset zaposlenika iz reda naučnoistraživačkog osoblja od kojih najmanje 30% zaposlenika sa stepenom doktora nauka i izborom u zvanje iz odgovarajuće naučne oblasti i najmanje 30% zaposlenika sa stepenom magistra i izborom u zvanje iz odgovarajuće naučne oblasti;
 - e) dokaz da je imenovano vijeće naučnoistraživačkog instituta sastavljeno od najmanje pet članova od kojih najmanje 40% ima stepen doktora nauka i odgovarajući izbor u zvanje i 40% stepen magistra i odgovarajući izbor u zvanje;
 - f) dokaz da su izvršeni izbori u naučna i istraživačka zvanja u skladu sa ovim zakonom i statutom (ugovori o radu; prijava PIO/MIO);
 - g) dokaz da je za direktora imenovano lice sa stepenom doktora nauka;
 - h) dokaz da je osnivač obezbijedio prostor, opremu i sredstva u skladu sa elaboratom;
 - i) ispunjenost naprijed propisanih uslova od strane već osnovanih i novoosnovanih naučnoistraživačkih instituta vrši Ministarstvo svakih pet godina po proceduri koja je propisana ovim zakonom.
- (2) Ispunjenost uslova iz stava (1) ovog člana provjerava se kod osnivanja naučnoistraživačkih instituta kao organizacione jedinice u okviru visokoškolske ustanove i kod osnivanja naučnoistraživačkog instituta kao ustanove.
- (3) Po zahtjevu iz stava (1) ovog člana Ministarstvo imenuje stručnu komisiju za provjeru ispunjenosti uslova za početak rada naučnoistraživačkog instituta kao ustanove.
- (4) Stručnu komisiju iz stava (3) ovog člana, koja broji najmanje pet članova, imenuje Ministarstvo iz reda istaknutih naučnih radnika i stručnjaka iz odgovarajuće oblasti sadržane u elaboratu, predstavnika osnivača naučnoistraživačkog instituta kao ustanove te predstavnika Ministarstva.
- (5) Stručna komisija iz stava (3) ovog člana razmatra zahtjev, procjenjuje dokaze i na licu mjesta vrši provjeru ispunjenosti uslova propisanih ovim zakonom i pravilnikom iz stava (8) ovog člana.
- (6) Nakon što stručna komisija iz stava (3) ovog člana provede postupak u skladu sa rješenjem o imenovanju, podnosi izvještaj o svom radu ministru sa mišljenjem o ispunjenosti propisanih uslova za početak rada i daljnji rad i prijedlogom u odnosu na donošenje rješenja kojim se novoosnovanom naučnoistraživačkom institutu kao ustanovi dozvoljava početak rada.
- (7) Na osnovu rješenja o ispunjenosti uslova za početak rada novoosnovani naučnoistraživački institut kao ustanova upisuje se u Registar naučnoistraživačkih subjekata na području Kantona Sarajevo (u daljnjem tekstu: Registar).
- (8) Postupak upisa i brisanja iz Registra iz stava (7) ovog člana, kao i ostala pitanja bitna za postupak osnivanja i daljnji rad naučnoistraživačkog instituta kao ustanove uredit će se pravilnikom koji donosi ministar.
- (9) Registar iz stava (7) ovog člana vodi Ministarstvo.
- (10) Ako naučnoistraživački institut kao ustanovu osnivaju dva ili više osnivača, njihovi međusobni odnosi, prava, obaveze i odgovornosti uređuju se ugovorom, koji se

zaključuje u pisanoj formi, u kojem slučaju se ugovor dostavlja uz zahtjev iz stava (1) ovog člana.

DIO ŠESTI – NAUČNOISTRAŽIVAČKO OSOBLJE

Član 20. **(Naučna i istraživačka zvanja)**

- (1) Naučna zvanja u smislu ovog zakona su:
 - a) naučni savjetnik;
 - b) viši naučni saradnik;
 - c) naučni saradnik.
- (2) Istraživačka zvanja u smislu ovog zakona su:
 - a) stručni savjetnik;
 - b) viši stručni saradnik;
 - c) stručni saradnik.
- (3) Ukoliko se na visokoškolskoj ustanovi ukaže potreba za sudjelovanjem naučnoistraživačkog osoblja koje je izabrano na osnovu ovog zakona u realizaciji nastavnog procesa i sudjelovanju u radu komisija, tim licima se za vrijeme trajanja angažmana, bez priznavanja naučnoistraživačkog zvanja kao akademskog zvanja koje je dodijeljeno shodno odredbama Zakona o visokom obrazovanju, priznaje samo uživanje prava članova akademskog osoblja u vezi sa izvođenjem nastavnog procesa odnosno rada u komisiji, i to:
 - a) stručnom saradniku priznaju se prava asistenta,
 - b) višem stručnom saradniku priznaju se prava višeg asistenta,
 - c) stručnom savjetniku priznaju se prava višeg asistenta u drugom izbornom periodu, pod uslovom da je stekao stepen doktora nauka,
 - d) naučnom saradniku priznaju se prava docenta,
 - e) višem naučnom saradniku priznaju se prava vanrednog profesora,
 - f) naučnom savjetniku priznaju se prava redovnog profesora.
- (4) Za vrijeme angažmana odnosno sudjelovanja u realizaciji nastavnog procesa naučnoistraživačko osoblje ne stiče akademsko zvanje.

Član 21. **(Oduzimanje zvanja)**

- (1) Naučnoistraživačko zvanje može biti oduzeto ako se dokaže da je lažno ili na temelju falsifikata naveden neki od uslova za izbor.
- (2) O oduzimanju naučnoistraživačkog zvanja odluku donosi senat visokoškolske ustanove na prijedlog vijeća organizacione jedinice odnosno Ministarstvo na prijedlog vijeća naučnoistraživačkog instituta kao ustanove.
- (3) Prijedlog za pokretanje postupka za oduzimanje naučnoistraživačkog zvanja može pokrenuti direktor, vijeće i učesnik u konkursu za izbor u naučnoistraživačko zvanje.
- (4) Nakon prijema prijedloga za pokretanje postupka za oduzimanje naučnoistraživačkog zvanja vijeće organizacione jedinice odnosno vijeće naučnoistraživačkog instituta kao ustanove imenuje komisiju od pet (5) članova u istom ili višem zvanju u odnosu na zvanje kandidata koji je predmet postupka za oduzimanje naučnoistraživačkog zvanja.
- (5) U komisiju iz stava (4) ovog člana ne mogu biti imenovani članovi komisije koji su bili članovi komisije u postupku u kojem je lice, protiv kojeg je pokrenut postupak, steklo naučnoistraživačko zvanje.

- (6) Komisija iz stava (4) ovog člana provjerava osnovanost tvrdnji odnosno navoda iznesenih u prijedlogu za pokretanje postupka za oduzimanje naučnoistraživačkog zvanja i pisani izvještaj dostavlja direktoru. Direktor u roku od sedam dana, dostavlja izvještaj komisije predlagatelju postupka i licu protiv kojeg je pokrenut postupak na izjašnjenje u roku od sedam dana od dana prijema izvještaja.
- (7) Nakon proteka roka iz stava (6) ovog člana, direktor saziva sjednicu vijeća najkasnije u roku od 30 dana od dostave odgovora predlagatelja pokretanja postupka i lica protiv kojeg je pokrenut postupak radi utvrđivanja prijedloga za oduzimanje naučnoistraživačkog zvanja.
- (8) Na sjednicu vijeća pozivaju se predlagatelj i lice protiv kojeg je pokrenut postupak. Vijeće razmatra sve predložene dokaze i odlučuje o postojanju osnova za oduzimanje naučnoistraživačkog zvanja. Ako vijeće odluči da postoji osnova za oduzimanje naučnoistraživačkog zvanja, ono podnosi prijedlog o oduzimanju naučnoistraživačkog zvanja senatu visokoškolske ustanove odnosno Ministarstvu ukoliko se radi o naučnoistraživačkom institutu kao ustanovi, u roku od 7 dana od dana održavanja sjednice vijeća.
- (9) Protiv odluke senata odnosno Ministarstva iz stava (8) ovog člana o oduzimanju naučnoistraživačkog zvanja nije dozvoljena žalba, ali se protiv iste može pokrenuti upravni spor pred nadležnim sudom u Sarajevu, u roku od 30 dana od dana prijema odluke.
- (10) Oduzimanjem naučnoistraživačkog zvanja gube se sva prava koja su stečena osporenim izborom u naučnoistraživačko zvanje.

Član 22.
(Sastav vijeća)

Vijeće naučnoistraživačkog instituta čine svi zaposlenici u radnom odnosu sa najmanje 50% radnog vremena u tom naučnoistraživačkom institutu i koji imaju zvanje doktora nauka odnosno zvanje magistra.

Član 23.
(Direktor instituta)

- (1) Direktor naučnoistraživačkog instituta je organ rukovođenja institutom.
- (2) Direktora instituta bira vijeće naučnoistraživačkog instituta, tajnim glasanjem, nakon provedene procedure javnog konkursa.
- (3) Direktor instituta bira se na mandatni period od 4 (četiri) godine i može biti ponovo izabran. Isto lice može biti imenovano za direktora na dva uzastopna mandata.

Član 24.
(Uslovi i postupak za izbor direktora)

- (1) Za direktora naučnoistraživačkog instituta kao organizacione jedinice ili naučnoistraživačkog instituta kao ustanove može biti izabrano lice koje ima naučni stepen doktora nauka i izbor u zvanje naučnog savjetnika ili višeg naučnog saradnika.
- (2) Postupak izbora direktora pokreće vijeće organizacione jedinice ili naučnoistraživačkog instituta kao ustanove svojom odlukom najkasnije šest mjeseci prije isteka mandata direktora na dužnosti. Na istoj sjednici imenuje se komisija za provođenje postupka izbora direktora koja broji tri člana, a koji posjeduju zvanje doktora nauka. Prijavljeni kandidat za direktora ne može biti član komisije.

- (3) Konkurs za izbor direktora objavljuje se u najmanje jednom dnevnom listu i na web stranici visokoškolske ustanove, organizacione jedinice odnosno naučnoistraživačkog instituta kao ustanove. Rok za prijavljivanje kandidata je 15 dana od dana objavljivanja konkursa.
- (4) U prijavi za izbor direktora kandidati, pored dokumenata kojima dokazuju da ispunjavaju uslove predviđene Zakonom, prilažu: biografiju, opis naučnog/umjetničkog i stručnog rada te program rada i razvoja naučnoistraživačkog instituta za naredni mandatni period.
- (5) Nakon isteka roka za prijavljivanje kandidata, komisija u roku od sedam dana podnosi izvještaj vijeću o prijavljenim kandidatima odnosno o kandidatima koji ispunjavaju utvrđene uslove.
- (6) Direktor u roku od sedam dana od dana podnošenja izvještaja komisije saziva sjednicu vijeća na koju se pozivaju kandidati koji ispunjavaju uslove za izbor direktora koji na istoj sjednici javno prezentiraju svoj program rada i razvoja naučnoistraživačkog instituta.
- (7) Nakon javne prezentacije programa rada kandidata za izbor direktora, vijeće na istoj sjednici bira direktora.
- (8) Vijeće bira direktora tajnim glasanjem. Za direktora je izabran kandidat koji je dobio natpolovičnu većinu glasova od ukupnog broja članova vijeća.
- (9) Ukoliko se u postupku za izbor direktora prijavi jedan kandidat, a nakon obavljenog glasanja ne dobije potrebnu većinu glasova, glasanje se ponavlja još jednom. Ukoliko u ponovljenom glasanju kandidat ne dobije potrebnu većinu glasova, cjelokupni izborni postupak se ponavlja.
- (10) Ukoliko se u postupku za izbor direktora prijavi više kandidata, izabran je onaj kandidat koji dobije potrebnu većinu glasova. Ukoliko niti jedan kandidat ne dobije potrebnu većinu glasova, glasanje se ponavlja. U ponovljenom glasanju izbor se vrši između dva kandidata koji su dobili najveći broj glasova, odnosno između više njih ako su dobili jednak broj glasova. U ponovljenom glasanju izabran je onaj kandidat koji dobije potrebnu većinu glasova. Ukoliko u ponovljenom glasanju dva ili više kandidata dobiju podjednak broj glasova, glasanje se ponavlja još jednom. Ukoliko ni tada nijedan kandidat ne dobije potrebnu većinu glasova, cjelokupni izborni postupak se ponavlja.
- (11) Nakon donesene odluke o izboru, vijeće naučnoistraživačkog instituta kao organizacione jedinice visokoškolske ustanove dostavlja rektoru na potpis odluku o imenovanju direktora.
- (12) Nakon donesene odluke o izboru, vijeće naučnoistraživačkog instituta kao ustanove istu sa kompletnom konkursnom dokumentacijom dostavlja ministru radi pribavljanja saglasnosti na odluku o imenovanju direktora.
- (13) Rektor je dužan potpisati rješenje o imenovanju i isto proslijediti naučnoistraživačkom institutu kao organizacionoj jedinici radi dostavljanja obavještenja o tome prijavljenim kandidatima i to najkasnije sedam dana od dana prijema rješenja na potpis.
- (14) Ministar je dužan donijeti odluku iz stava (12) ovog člana i istu proslijediti naučnoistraživačkom institutu kao ustanovi radi dostavljanja obavještenja o tome prijavljenim kandidatima i to najkasnije sedam dana od dana prijema odluke vijeća.
- (15) Odluka iz st. (13) i (14) ovog člana je konačna, a protiv iste se može pokrenuti upravni spor pred nadležnim sudom u Sarajevu.
- (16) Na raspisani konkurs za izbor direktora mogu se prijaviti kandidati koji su zaposleni u naučnoistraživačkom institutu u momentu podnošenja prijave na konkurs.
- (17) Direktor u toku mandata ne može vršiti funkciju člana upravnog odbora visokoškolske ustanove odnosno naučnoistraživačkog instituta kao ustanove niti može biti politički

angažiran u stranačkom rukovodstvu, zakonodavnoj, izvršnoj ili sudskoj vlasti bilo kojeg nivoa vlasti.

- (18) U postupku osnivanja naučnoistraživačkog instituta kao ustanove za direktora instituta može biti izabrano lice sa stepenom doktora nauka na period od četiri godine.

Član 25.

(Imenovanje vršioca dužnosti direktora)

- (1) U slučaju da se ne izvrši izbor direktora naučnoistraživačkog instituta, vijeće bez konkursa imenuje vršioca dužnosti direktora iz reda njegovih članova u naučnoistraživačkom zvanju, zaposlenog na institutu sa punim radnim vremenom, na period od najduže 6 (šest) mjeseci računajući od dana imenovanja.
- (2) Prijedlog za vršioca dužnosti, u smislu stava (1) ovog člana, može dati svaki član vijeća naučnoistraživačkog instituta s tim što se izbor vrši glasanjem, većinom glasova od ukupnog broja njegovih članova.
- (3) Vršilac dužnosti direktora naučnoistraživačkog instituta ima sva prava i dužnosti direktora.
- (4) Istovremeno s imenovanjem vršioca dužnosti direktora naučnoistraživačkog instituta vijeće donosi odluku o ponovnom raspisivanju konkursa za izbor direktora.
- (5) Direktor kojem je istekao drugi mandat ne može biti imenovan za vršioca dužnosti direktora.

Član 26.

(Odluka o imenovanju)

- (1) Odluka o imenovanju direktora sadrži:
 - a) ime i prezime izabranog direktora,
 - b) datum kada izabrani direktor stupa na dužnost i
 - c) trajanje mandata.
- (2) Prije preuzimanja dužnosti direktora izabrani kandidat obavezan je potpisati izjavu o prihvatanju dužnosti.

Član 27.

(Prestanak mandata direktora)

Direktoru prestaje mandat u sljedećim slučajevima:

- a) istekom perioda na koji je izabran,
- b) donošenjem odluke kojom je prihvaćena ostavka,
- c) prijevremenim razrješenjem i
- d) danom izbora na neku drugu funkciju nespojivu sa funkcijom direktora.

Član 28.

(Prijevremeno razrješenje direktora)

- (1) Vijeće naučnoistraživačkog instituta može donijeti odluku o razrješenju direktora i prije isteka perioda na koji je imenovan u sljedećim slučajevima:
 - a) ako ostvaruje loše poslovne rezultate,
 - b) ako mu je izrečena neka od mjera osiguranja u trajanju dužem od tri mjeseca – početkom primjene te mjere,

- c) ako ne izvršava zadatke predviđene Zakonom ili ih izvršava protivno Zakonu.
 - d) ako prekorači ovlaštenja i time nanese štetu naučnoistraživačkom institutu,
 - e) zbog odsutnosti ili spriječenosti da u neprekidnom periodu dužem od tri mjeseca obavlja dužnost i
 - f) ako svojim ponašanjem povrijedi ugled funkcije direktora.
- (2) Obrazložen prijedlog za razrješenje direktora, zbog jednog ili više razloga navedenih u prethodnom stavu ovog člana, vijeću može podnijeti:
- a) osnivač visokoškolske ustanove odnosno naučnoistraživačkog instituta kao ustanove,
 - b) jedna trećina članova upravnog odbora visokoškolske ustanove,
 - c) jedna trećina članova senata visokoškolske ustanove,
 - d) rektor i
 - e) jedna trećina članova vijeća naučnoistraživačkog instituta.
- (3) Direktor je dužan sazvati sjednicu vijeća najkasnije 15 dana od dana prijema prijedloga iz stava (2) ovog člana i o tome obavijestiti rektora odnosno Ministarstvo.
- (4) O prijevremenom razrješenju direktora vijeće odlučuje tajnim glasanjem, pri čemu je za donošenje odluke o razrješenju potrebna natpolovična većina glasova od ukupnog broja članova vijeća.
- (5) U slučaju da vijeće odbije inicijativu za razrješenje direktora, nova inicijativa po istom osnovu ne može se podnijeti prije isteka roka od šest mjeseci od podnošenja prethodne.

Član 29.

(Izbor u naučna i istraživačka zvanja u okviru visokoškolske ustanove)

- (1) Izbor naučnoistraživačkog osoblja u naučna i istraživačka zvanja u organizacionoj jedinici u okviru visokoškolske ustanove vrši se u svim slučajevima javnim konkursom, u skladu sa kriterijima utvrđenim ovim zakonom, statutom i pravilnikom kojim se utvrđuju općeprihvaćeni standardi u datoj oblasti koji donosi ministar.
- (2) Javni konkurs za izbor u naučnoistraživačko zvanje raspisuje nadležni organ visokoškolske ustanove na prijedlog vijeća u najmanje jednom dnevnom listu i internet stranici.
- (3) Za pripremanje prijedloga za izbor vijeće organizacione jedinice imenuje komisiju od tri člana, a predloženi članovi komisije moraju biti u istom ili višem zvanju od zvanja u koje se kandidat bira, a uz prethodno pribavljenu pisanu saglasnost svakog predloženog člana komisije za angažman u komisiji.
- (4) Većina članova komisije mora biti iz iste, a ostali članovi mogu biti iz srodne naučne oblasti za koju se kandidat bira.
- (5) Stručna služba organizacione jedinice obavezna je, prije dostavljanja pristiglih prijava na konkurs komisiji za izbor u zvanja, potvrditi, u pisanoj formi, potpunost i blagovremenost pristiglih prijava te naznačiti broj prijavljenih kandidata sa naznakom zvanja za koja su se kandidati prijavili.
- (6) Pisana potvrda iz stava (5) ovog člana dostavlja se rukovodiocu organizacione jedinice prije donošenja odluke o imenovanju komisije i predstavlja sastavni dio izvještaja komisije za izbor u zvanje.
- (7) Komisija iz stava (3) ovog člana obavezna je izvještaj sa prijedlogom za izbor u zvanje dostaviti vijeću u skladu sa tekstom raspisanog konkursa i aktom o imenovanju komisije i to u roku od 30 dana od isteka roka za podnošenje prijave na konkurs.
- (8) Rukovodilac organizacione jedinice obavezan je izvještaj sa prijedlogom komisije za izbor u zvanje uvrstiti u dnevni red sjednice vijeća u roku od 30 dana od dana dostavljanja izvještaja sa prijedlogom komisije.

- (9) Odluku o pitanjima izbora iz svoje nadležnosti vijeće donosi većinom glasova od ukupnog broja članova s tim da članovi vijeća prilikom glasanja ne mogu biti suzdržani.
- (10) Vijeće glasanjem utvrđuje prijedlog odluke o izboru i dostavlja je senatu na daljnje postupanje.
- (11) U slučaju da vijeće ne utvrdi pozitivan prijedlog odluke iz stava (10) ovog člana, odluka vijeća je konačna i protiv nje se može pokrenuti upravni spor pred nadležnim sudom u Sarajevu u roku od 30 dana od dana prijema odluke.
- (12) Rukovodilac organizacione jedinice je obavezan u roku od pet dana od dana održavanja sjednice vijeća na kojoj je utvrđen pozitivan prijedlog odluke o izboru isti dostaviti senatu na dalje postupanje.
- (13) Senat je obavezan donijeti odluku o izboru u zvanje u roku od 30 dana od dana prijema utvrđenog prijedloga odluke vijeća.
- (14) Odluka senata je konačna.
- (15) Rektor je obavezan u roku od pet dana od dana donošenja odluke o izboru u zvanje istu dostaviti rukovodiocu organizacione jedinice.
- (16) Ukoliko je odluka senata suprotna utvrđenom prijedlogu vijeća koje je prihvatilo izvještaj komisije, rektor je obavezan u roku od pet dana od dana njenog donošenja istu dostaviti organizacionoj jedinici sa odgovarajućim obrazloženjem radi ponovnog razmatranja i odlučivanja odnosno glasanja.
- (17) Rukovodilac organizacione jedinice obavezan je odluku vijeća u slučaju iz stava (16) ovog člana dostaviti senatu u roku od 30 dana na odlučivanje.
- (18) Senat će na prvoj narednoj sjednici, a najkasnije u roku 60 dana od dostavljanja odluke vijeća iz stava (17) ovog člana, donijeti konačnu odluku o izboru u zvanje, koja se dostavlja izabranom kandidatu i ostalim prijavljenim kandidatima putem organizacione jedinice.
- (19) Protiv odluke senata nije dozvoljena žalba, ali se može pokrenuti upravni spor pred nadležnim sudom u Sarajevu u roku od 30 dana od dana prijema odluke.

Član 30.

(Izbor u naučna i istraživačka zvanja u okviru naučnoistraživačkog instituta kao ustanove)

- (1) Izbor u naučna i istraživačka zvanja u okviru naučnoistraživačkog instituta kao ustanove vrši se u svim slučajevima javnim konkursom, u skladu sa kriterijima utvrđenim ovim zakonom, statutom i pravilnikom kojim se utvrđuju općeprihvaćeni standardi u datoj oblasti koji donosi ministar.
- (2) Javni konkurs za izbor u naučnoistraživačko zvanje raspisuje naučnoistraživački institut kao ustanova na prijedlog vijeća naučnoistraživačkog instituta kao ustanove u najmanje jednom dnevnom listu i internet stranici naučnoistraživačkog instituta kao ustanove, uz prethodnu saglasnost Ministarstva.
- (3) Za pripremanje prijedloga za izbor u zvanje iz stava (2) ovog člana Ministarstvo imenuje komisiju od tri člana na prijedlog vijeća, a predloženi članovi komisije moraju biti u istom ili višem zvanju od zvanja u koje se kandidat bira, a uz prethodno pribavljenu pisanu saglasnost svakog predloženog člana komisije za angažman u komisiji.
- (4) Dva člana komisije moraju biti iz iste, a treći član može biti iz srodne naučne oblasti za koju se kandidat bira.
- (5) Stručna služba naučnoistraživačkog instituta kao ustanove obavezna je, prije dostavljanja pristiglih prijava na konkurs komisiji za izbor u zvanja, potvrditi, u pisanoj

- formi, potpunost i blagovremenost pristiglih prijava te naznačiti broj prijavljenih kandidata sa naznakom zvanja za koja su se kandidati prijavili.
- (6) Pisana potvrda iz stava (5) ovog člana dostavlja se direktoru naučnoistraživačkog instituta kao ustanove koju prosljeđuje Ministarstvu prije donošenja odluke o imenovanju komisije i predstavlja sastavni dio izvještaja komisije za izbor u zvanje.
 - (7) Komisija iz stava (3) ovog člana obavezna je izvještaj sa prijedlogom za izbor u zvanje dostaviti vijeću u skladu sa tekstom raspisanog konkursa i aktom o imenovanju komisije i to u roku od 30 dana od isteka roka za podnošenje prijava na konkurs.
 - (8) Direktor naučnoistraživačkog instituta kao ustanove obavezan je izvještaj sa prijedlogom komisije za izbor u zvanje uvrstiti u dnevni red sjednice vijeća naučnoistraživačkog instituta kao ustanove u roku od 30 dana od dana dostavljanja izvještaja sa prijedlogom komisije.
 - (9) Odluku o pitanjima izbora iz svoje nadležnosti vijeće naučnoistraživačkog instituta kao ustanove donosi većinom glasova od ukupnog broja članova, s tim da članovi vijeća prilikom glasanja ne mogu biti suzdržani.
 - (10) Vijeće glasanjem utvrđuje prijedlog odluke o izboru i dostavlja je Ministarstvu radi donošenja odluke o davanju saglasnosti na utvrđeni prijedlog odluke vijeća.
 - (11) U slučaju da vijeće ne utvrdi pozitivan prijedlog odluke iz stava (10) ovog člana, odluka vijeća je konačna i protiv nje se može pokrenuti upravni spor pred Kantonalnim sudom u Sarajevu u roku od 30 dana od dana prijema odluke.
 - (12) Direktor naučnoistraživačkog instituta kao ustanove je obavezan u roku od pet dana od dana održavanja sjednice vijeća na kojoj je utvrđen pozitivan prijedlog odluke o izboru isti dostaviti Ministarstvu na dalje postupanje.
 - (13) Ministarstvo donosi odluku o davanju saglasnosti na utvrđeni prijedlog vijeća u roku od 30 dana od dana prijema utvrđenog prijedloga odluke vijeća.
 - (14) Ministarstvo je obavezno u roku od sedam dana od dana donošenja odluke iz stava (13) ovog člana istu dostaviti direktoru naučnoistraživačkog instituta kao ustanove.
 - (15) Nakon dostavljanja odluke iz stava (13) ovog člana, direktor naučnoistraživačkog instituta kao ustanove izdaje i potpisuje odluku o izboru u zvanje, koja se dostavlja izabranom kandidatu i ostalim prijavljenim kandidatima putem naučnoistraživačkog instituta.
 - (16) Odluka vijeća je konačna i protiv nje se može pokrenuti upravni spor pred Kantonalnim sudom u Sarajevu u roku od 30 dana od dana prijema odluke.

Član 31.

(Minimalni uslovi za izbor u naučna i istraživačka zvanja)

- (1) Minimalni uslovi za izbor u naučna i istraživačka zvanja su:
 - a) stručni saradnik: odgovarajuća visoka stručna sprema iz oblasti za koju se bira sa prosječnom ocjenom najmanje 8 ili 3,5, pokazane naučnoistraživačke sposobnosti;
 - b) viši stručni saradnik: naučni stepen magistra iz oblasti za koju se bira sa prosječnom ocjenom najmanje 8 na postdiplomskom studiju ili stepen drugog ciklusa studija iz oblasti za koju se bira sa prosječnom ocjenom i na prvom i na drugom ciklusu studija najmanje 8 ili 3,5; pokazane naučnoistraživačke sposobnosti;
 - c) stručni savjetnik: naučno zvanje doktora iz oblasti za koju se bira ili stepen trećeg ciklusa studija iz oblasti za koju se bira sa prosječnom ocjenom na prvom, drugom i trećem ciklusu studija najmanje 8 ili 3,5; pokazane naučnoistraživačke sposobnosti;

- d) naučni saradnik: naučno zvanje doktora iz oblasti za koju se bira ili stepen trećeg ciklusa studija iz oblasti za koju se bira sa prosječnom ocjenom na prvom, drugom i trećem ciklusu studija najmanje 8 ili 3,5; najmanje tri naučna rada iz oblasti za koju se bira objavljena u priznatim publikacijama; pokazane naučnoistraživačke sposobnosti;
 - e) viši naučni saradnik: proveden najmanje jedan izborni period u zvanju naučnog saradnika, najmanje pet naučnih radova iz oblasti za koju se bira objavljenih u priznatim publikacijama, objavljena naučna knjiga i originalni naučni uspjeh kao što je naučni projekt, patent ili originalni metod, sve nakon izbora u zvanje naučnog saradnika;
 - f) naučni savjetnik: proveden najmanje jedan izborni period u zvanju višeg naučnog saradnika, najmanje osam naučnih radova iz oblasti za koju se bira objavljenih u priznatim publikacijama, najmanje dvije objavljene naučne knjige i originalni naučni uspjeh kao što je naučni projekt, patent ili originalni metod, sve nakon izbora u zvanje višeg naučnog saradnika.
- (2) Odlukom ministra, a na prijedlog Savjeta za nauku, definisat će se poseban status jezika, književnosti, historije, kulture i umjetnosti te druge naučne/umjetničke oblasti od posebnog značaja za Bosnu i Hercegovinu te utvrditi dodatni kriteriji za izbor u naučna i istraživačka zvanja.
 - (3) Učešće naučnoistraživačkog osoblja u realizaciji naučnoistraživačkog projekta od posebnog interesa za Kanton, u postupku izbora u isto ili više zvanje, vrednuje se kao naučni projekt, patent ili originalni metod, s tim da član naučnoistraživačkog osoblja može u toku izbornog perioda ostvariti vrednovanje najviše dva naučnoistraživačka projekta.
 - (4) Vrednovanje učešća naučnoistraživačkog osoblja u realizaciji naučnoistraživačkog projekta od posebnog interesa za Kanton posebnim aktom priznaje odnosno verificira Ministarstvo, a akt Ministarstva služi kao dokaz u postupku izbora naučnoistraživačkog osoblja u isto ili više zvanje.
 - (5) Pod naučnom knjigom iz ovog člana smatra se naučna knjiga definisana Zakonom o visokom obrazovanju.

Član 32.

(Period izbora i statusna pitanja)

- (1) Naučnoistraživačko osoblje bira se na određeni izborni period, i to:
 - a) stručni saradnik na period od četiri godine bez mogućnosti ponovnog izbora;
 - b) viši stručni saradnik na period od pet godina s mogućnošću jednog ponovnog izbora;
 - c) stručni savjetnik na period od pet godina s mogućnošću jednog ponovnog izbora;
 - d) naučni saradnik na period od pet godina s mogućnošću jednog ponovnog izbora;
 - e) viši naučni saradnik na period od šest godina s mogućnošću jednog ponovnog izbora;
 - f) naučni savjetnik trajno.
- (2) Član naučnoistraživačkog osoblja u zvanju naučnog saradnika ili višeg naučnog saradnika može biti izabran u više zvanje i prije isteka perioda na koji je biran ukoliko ispuni uslove za izbor u više naučno zvanje i ukoliko je u postojećem zvanju proveo najmanje tri godine nakon posljednjeg izbora.
- (3) Član naučnoistraživačkog osoblja zaključuje ugovor o radu na period na koji je izabran, osim naučnog savjetnika, koji zaključuje ugovor o radu na neodređeno vrijeme.

- (4) Nakon isteka izbornog perioda visokoškolska ustanova i naučnoistraživački institut kao ustanova obavezni su zaključiti novi ugovor o radu sa svakim članom naučnoistraživačkog osoblja koji je izabran u isto ili više naučno ili istraživačko zvanje.
- (5) Rokovi za izbor u isto ili više zvanje naučnoistraživačkog osoblja produžit će se za vrijeme provedeno na porodiljskom odsustvu, bolovanju dužem od šest mjeseci, javnoj dužnosti ili iz drugih opravdanih razloga, u skladu sa zakonom, a što se preciznije utvrđuje statutom visokoškolske ustanove i naučnoistraživačkog instituta kao ustanove.
- (6) Visokoškolska ustanova odnosno organizaciona jedinica i naučnoistraživački institut kao ustanova u roku od šest mjeseci od dana stupanja na snagu ovog zakona obavezni su donijeti program mjera za stvaranje uslova za napredovanje naučnoistraživačkog osoblja, kao i plan kadrovskih potreba za naredni petogodišnji period.
- (7) Plan iz stava (6) ovog člana visokoškolska ustanova i naučnoistraživački institut kao ustanova, obavezni su dostaviti Ministarstvu odmah po njegovoj izradi, a izvještaj o provođenju programa iz stava (6) ovog člana na početku svake kalendarske godine.
- (8) Član naučnoistraživačkog osoblja koji navršši 65 godina života i ispuni uslove za prestanak radnog odnosa ne može na osnovu konkursa biti biran u isto ili više zvanje.
- (9) Član naučnoistraživačkog osoblja iz stava (8) ovog člana može ostati u radnom odnosu u naučnoistraživačkom institutu do navršene 70-te godine života, ukoliko nakon provedene konkursne procedure u skladu sa čl. 29. i 30. ovog zakona, na to mjesto nije izabran drugi član naučnoistraživačkog osoblja i ukoliko mu to omogućava odluka o izboru u zvanje, uz obavezu da o namjeri ostanka u radnom odnosu do 70-te godine života pisanim, putem upozna direktora naučnoistraživačkog instituta, šest mjeseci prije navršenih 65 godina života.
- (10) Članu naučnoistraživačkog osoblja koji navršši 70 godina života prestaje mogućnost angažmana po bilo kojem osnovu u naučnoistraživačkom institutu, uz izuzetak profesora emeritusa.

Član 33. **(Istek izbornog perioda i ugovor o radu)**

Kada član naučnoistraživačkog osoblja nakon isteka izbornog perioda ne bude izabran u isto ili više zvanje, visokoškolska ustanova odnosno organizaciona jedinica i naučnoistraživački institut kao ustanova mogu, prije otkazivanja ugovora o radu, ponuditi članu naučnoistraživačkog osoblja zaključivanje novog ugovora o radu na poslovima za koje se ne traži izbor u naučnoistraživačko zvanje, ako za to postoji mogućnost i potreba, a što se preciznije definira statutom visokoškolske ustanove, odnosno naučnoistraživačkog instituta kao ustanove.

DIO SEDMI – NADZOR

Član 34. **(Nadzor nad provođenjem zakona)**

- (1) Nadzor nad provođenjem ovog zakona i propisa donesenih na osnovu ovog zakona vrši Ministarstvo.
- (2) Odgovorna tijela naučnoistraživačkog instituta kao organizacione jedinice ili ustanove obavezna su na zahtjev Ministarstva u zahtijevanom roku dostaviti sve tražene informacije i dokumente potrebne za izvršavanje nadležnosti.
- (3) U vršenju nadzora Ministarstvo može, u cilju utvrđivanja relevantnih činjenica i okolnosti u svakom konkretnom slučaju, zatražiti od nadležne inspekcije za oblast

obrazovanja provođenje radnji u skladu sa zakonom i dostavljanje informacije o utvrđenom stanju i preduzetim mjerama.

- (4) Nadležna inspekcija za oblast obrazovanja obavezna je, u posljednjoj sedmici mjeseca novembra, dostaviti Ministarstvu izvještaj o provedenim inspekcijskim pregledima u tekućoj godini, o utvrđenom stanju, pojavama i problemima, kao i o preduzetim mjerama, sa prijedlogom mjera i aktivnosti koje bi trebalo preduzeti za preveniranje, kao i otklanjanje utvrđenog nezakonitog djelovanja.

Član 35. **(Inspekcijski nadzor)**

- (1) Inspekcijski nadzor nad provođenjem ovog zakona, provedbenih propisa, kao i akata i odluka tijela/organa naučnoistraživačkog instituta kao organizacione jedinice ili ustanove donesenih u cilju izvršenja obaveza utvrđenih ovim zakonom vrši inspekcija za oblast obrazovanja, u skladu sa zakonom.
- (2) Kada u vršenju inspekcijskog nadzora nadležna inspekcija utvrdi da naučnoistraživački institut kao organizaciona jedinica ili ustanova ne ispunjava uslove za rad odnosno postupa suprotno odredbama ovog zakona, odredit će primjeren rok za otklanjanje utvrđenih nedostataka i o tome obavijestiti osnivača odnosno Ministarstvo.
- (3) Ukoliko naučnoistraživački institut kao organizaciona jedinica ili ustanova nakon isteka utvrđenog roka iz stava (2) ovog člana ne otkloni utvrđene nepravilnosti nadležna inspekcija će o tome dostaviti obavijest Ministarstvu s ciljem donošenja rješenja o zabrani daljeg rada i brisanja istog iz Registra iz člana 19. stav (7) ovog zakona.
- (4) Ministarstvo će donijeti rješenje o zabrani daljnjeg rada i po službenoj dužnosti izvršiti brisanje naučnoistraživačkog instituta kao organizacione jedinice ili ustanove iz Registra.
- (5) Kada nadležna inspekcija utvrdi nepravilnosti u radu koje ne sprečavaju daljnji rad naučnoistraživačkog instituta kao organizacione jedinice ili ustanove odnosno kada utvrdi da isti ne postupa u skladu sa Zakonom ili postupa nepravilno ili nepotpuno prema obavezama koje su joj određene propisima, obavezna je prema utvrđenom činjeničnom stanju naložiti odgovarajuće upravne mjere i to:
- a) narediti da se utvrđeni nedostaci i nepravilnosti otklone na način i u roku kako je određeno ovim zakonom ili ukoliko takav rok nije propisan odrediti primjereni rok u skladu sa zakonom;
 - b) narediti preduzimanje odgovarajućih upravnih radnji i mjera radi otklanjanja utvrđenih nepravilnosti ili nedostatka u roku i na način kako je naloženo;
 - c) narediti odgovarajuće upravne mjere za potpunu i pravilnu primjenu ovog zakona, drugih propisa i akata donesenih na osnovu ovog zakona;
 - d) zabraniti preduzimanje radnji za koje utvrdi da su u suprotnosti sa ovim zakonom, provedbenim propisima i aktima donesenim u cilju provođenja ovog zakona;
 - e) izdati prekršajni nalog;
 - f) podnijeti zahtjev za pokretanje prekršajnog postupka;
 - g) podnijeti izvještaj nadležnom organu o učinjenom krivičnom djelu;
 - h) preduzeti druge mjere i radnje za koje je zakonom i drugim propisima ovlaštena.
- (6) Nadležna inspekcija upravne mjere nalaže rješenjem. Protiv rješenja inspekcije može se izjaviti žalba Ministarstvu u roku od osam dana od dana prijema rješenja.
- (7) Žalba na rješenje iz stava (6) ovog člana ne odlaže izvršenje rješenja.

Član 36.
(Kazne za prekršaje)

- (1) Novčanom kaznom u iznosu od 1.000 KM do 5.000 KM kaznit će se za prekršaj naučnoistraživački institut kao organizaciona jedinica ili ustanova, ako:
 - a) obavlja djelatnost suprotno ovom zakonu;
 - b) vrši statusne promjene suprotno ovom zakonu ili Zakonu o visokom obrazovanju za organizacione jedinice u okviru visokoškolske ustanove;
 - c) dodjeljuje naučna i istraživačka zvanja ili vrši izbor naučnoistraživačkog osoblja koje ne ispunjava uslove za izbor propisane ovim zakonom i provedbenim propisima;
 - d) zaključi ugovor o radu sa članom naučnoistraživačkog osoblja suprotno ovom zakonu;
 - e) izvršava aktivnosti za koje nije zakonom ovlašten;
 - f) izvrši izbor direktora suprotno uslovima ili proceduri koja je propisana ovim zakonom;
 - g) ne izvrši naloženu upravnu mjeru u roku i na način kako je naloženo rješenjem nadležne inspekcije.
- (2) Novčanom kaznom u iznosu od 500 KM do 3.000 KM kaznit će se za prekršaj odgovorno lice naučnoistraživačkog instituta kao organizacione jedinice ili ustanove, ako:
 - a) imenuje komisiju za pripremanje prijedloga za izbor suprotno ovom zakonu;
 - b) ne osigura da se propisane radnje u postupku izbora naučnoistraživačkog osoblja provedu u rokovima propisanim ovim zakonom.
- (3) Za prekršaje iz stava (1) ovog člana kaznit će se i odgovorno lice za zastupanje naučnoistraživačkog instituta kao organizacione jedinice ili ustanove u pravnom prometu.

Član 37.
(Implementacijske mjere i nastavak rada)

- (1) Savjet za nauku će pripremiti nacrt Strategije za razvoj nauke najkasnije u roku od devet mjeseci od dana imenovanja i isti dostaviti Ministarstvu radi upućivanja nacrta Vladi u daljnju proceduru.
- (2) Prijedlog Strategije za razvoj nauke iz stava (1) ovog člana Vlada će uputiti na usvajanje Skupštini u roku od 30 dana od dana utvrđivanja prijedloga.
- (3) Osnivanje naučnoistraživačkih instituta kao ustanova vršit se u skladu sa ovim zakonom i Strategijom za razvoj nauke.
- (4) Postupci osnivanja kao i druge statusne promjene započete prema odredbama propisa koji su važili prije stupanja na snagu ovog zakona završit će se prema tim propisima.
- (5) Postupak izbora u naučna i istraživačka zvanja koja su započeta prema odredbama propisa koji su važili prije stupanja na snagu ovog zakona završit će se prema tim propisima.

- (6) Nakon isteka izbornog perioda u naučno ili istraživačko zvanje koje je izvršeno prije stupanja na snagu ovog zakona, izbor u isto ili više zvanje vršit će se prema odredbama ovog zakona.
- (7) Naučnoistraživačko osoblje koje je birano u zvanje prema odredbama zakona koji stupanjem na snagu ovog zakona prestaje da važi, a koje se nalazi u prvom izbornom periodu ima pravo nakon isteka izbornog perioda ostati u tom zvanju i to bez provođenja konkursne procedure najduže za vremenski period koji je za to zvanje propisan ovim zakonom.
- (8) Nakon isteka izbornog perioda u slučaju iz stava (7) ovog člana, procedura izbora u naučnoistraživačko zvanje se provodi prema odredbama ovog zakona.
- (9) Ministarstvo će u roku od 60 dana od dana stupanja na snagu ovog zakona donijeti odluku o utvrđivanju priznatih publikacija koje se vrednuju, na svim visokoškolskim ustanovama, kao i naučnoistraživačkim institutima kao ustanovama na području Kantona, u postupku izbora u naučnoistraživačka zvanja, kao i pravilnik o klasifikaciji naučnih oblasti, polja i grana, a sve uz prethodno provedene konsultacije sa svim visokoškolskim ustanovama, kao i naučnoistraživačkim institutima kao ustanovama na području Kantona.
- (10) Ministarstvo će u roku od 30 dana od dana stupanja na snagu ovog zakona donijeti pravilnik iz čl. 19. stav (8), 29. stav (1) i 30. stav (1) ovog zakona.
- (11) Postupak provjere ispunjenosti uslova iz člana 19. stav (1) ovog zakona za institute koji su osnovani prije stupanja na snagu ovog zakona Ministarstvo provodi nakon proteka roka od tri godine od dana stupanja na snagu ovog zakona.

Član 38.
(Prestanak primjene)

Danom stupanja na snagu ovog zakona prestaje primjena Zakona o naučnoistraživačkoj djelatnosti („Službene novine Kantona Sarajevo“, broj: 10/04).

Član 39.
(Stupanje na snagu)

Ovaj zakon stupa na snagu osmog dana od dana objavljivanja u “Službenim novinama Kantona Sarajevo”.

***PREDSJEDATELJICA SKUPŠTINE
KANTONA SARAJEVO***

Prof. Ana Babić

Broj: 01-05-_____/16
Sarajevo, _____ 2016. godine

O B R A Z L O Ž E N J E

I – PRAVNI OSNOV

Pravni osnov za donošenje ovog Zakona sadržan je u odredbama čl. 12. tačka b) i 18. tačka b) Ustava Kantona Sarajevo ("Službene novine Kantona Sarajevo", broj: 1/96, 2/96-Ispravka, 3/96-Ispravka, 16/97, 14/00, 4/01, 28/04 i 6/13).

Programom rada za 2015. godinu Ministarstvo za obrazovanje, nauku i mlade Kantona Sarajevo u obavezi je predložiti donošenje Zakona o izmjenama i dopunama Zakona o naučnoistraživačkoj djelatnosti („Službene novine Kantona Sarajevo“, broj: 10/04).

S obzirom da je trenutno važeći Zakon o naučnoistraživačkoj djelatnosti usvojen 2004. godine i do sada nije mijenjan, potrebno ga je inovirati odnosno uskladiti sa pomijeranjem granica u naučnom radu, promjenama i transformaciji procesa u integrisanu visokoškolsku ustanovu. Pojedine odredbe trenutno važećeg Zakona neophodno je uskladiti sa Okvirnim zakonom o osnovama naučnoistraživačke djelatnosti i koordinaciji unutrašnje i međunarodne naučno-istraživačke saradnje Bosne i Hercegovine ("Službeni glasnik BiH", broj: 43/09), dok je veoma važne procese u naučnoistraživačkoj djelatnosti potrebno neizostavno propisati i/ili izmijeniti zbog nepraktičnosti u primjeni Zakona te harmonizirati sa Zakonom o visokom obrazovanju.

Zbog svega naprijed navedenog, a u vezi sa članom 47. stav (3) Pravila i postupaka za izradu zakona i drugih propisa u Federaciji Bosne i Hercegovine („Službene novine Federacije BiH“, broj: 71/14), kojim je propisano pristupanje donošenju novog propisa ukoliko se više od polovine članova mijenja odnosno dopunjuje, što jeste slučaj u ovom konkretnom slučaju, Ministarstvo predlaže donošenje novog zakona Zakona o naučnoistraživačkoj djelatnosti.

U skladu sa čl. 26. i 28. stav (4) Zakona o Vladi Kantona Sarajevo („Službene novine Kantona Sarajevo“, broj: 36/14-Prečišćeni tekst i 37/14-Ispravka), Vlada zaključkom utvrđuje prijedlog zakona i predlaže donošenje istog Skupštini Kantona Sarajevo.

II – RAZLOZI ZA DONOŠENJE ZAKONA

U postupku pripreme ovog zakona ministar za obrazovanje, nauku i mlade Kantona Sarajevo imenovao je Komisiju (predstavnicima Ministarstva i akademske zajednice) koja je predložila pravna rješenja za sve probleme u okviru naučnoistraživačke djelatnosti na području Kantona Sarajevo, a imajući u vidu činjenicu da je neophodno:

- pravno riješiti pitanje izdvajanja finansijskih sredstava za naučnoistraživački rad iz Budžeta Kantona Sarajevo;

- precizirati subjekte koji se mogu baviti naučnoistraživačkom djelatnošću, uz naglasak na pravna lica koja se osnivaju izvan visokoškolske ustanove;
- propisati uslove koje moraju ispunjavati pravna lica u osnivanju;
- podsticati naučnoistraživačku djelatnost u okviru Univerziteta u Sarajevu;
- pravno riješiti neusklađenosti u odnosu na primjenu Zakona o visokom obrazovanju (princip ekvivalencije),
- regulisati pitanje izbora u naučna i saradnička zvanja jer uslovi definisani postojećim zakonskim tekstom ne prepoznaju tzv. bolonjska zvanja;
- predložiti osnivanje Savjeta za nauku Kantona Sarajevo (uloga, sastav, funkcija i nadležnosti);
- predvidjeti uspostavu baza podataka od strane Ministarstva i vođenje odgovarajućih evidencija naučnih institucija i naučnih radnika i sradnika, a u cilju efikasne saradnja sa višim nivoima vlasti;
- razraditi pitanje nadzora u ovoj oblasti jer važećim Zakonom taj dio uopšte nije regulisan te
- riješiti mnoga druga pitanja neophodna za obavljanje naučnoistraživačke djelatnosti na području Kantona Sarajevo.

Shodno Zaključku Skupštine Kantona Sarajevo, broj: 01-02-2883/16 od 01.02.2016. godine, dostavljene amnadmane na nacrt Zakona, Ministarstvo za obrazovanje, nauku i mlade Kantona Sarajevo tretiralo je kao primjedbe i prijedloge.

U toku javne rasprave pristiglo je ukupno 13 primjedbi/prijedloga na nacrt Zakona, od kojih:

- pet primjedbi/prijedloga Ministarstvo je prihvatilo/usvojilo kao osnovano;
- osam primjedbi/prijedloga Ministarstvo nije prihvatilo/usvojilo (uz obrazloženje).

III – PRAVNA RJEŠENJA

Prijedlog zakona pripremljen je na način da je prvenstveno vođeno računa da isti bude usklađen sa odredbama Okvirnog zakona o osnovama naučno-istraživačke djelatnosti i koordinaciji unutrašnje i međunarodne naučno-istraživačke saradnje Bosne i Hercegovine ("Službeni glasnik BiH", broj: 43/09) čiji je osnovni cilj nauci i tehnološkom razvoju dati prioritetan značaj te da Bosna i Hercegovina, entiteti, kantoni i Brčko Distrikt Bosne i Hercegovine budu dio međunarodnog, posebno evropskog naučnoistraživačkog prostora.

Prijedlogom Zakona utvrđuje se:

- poseban interes Kantona Sarajevo u oblasti nauke i tehnologije,

- osnovni principi naučnoistraživačke djelatnosti,
- sudjelovanje u ostvarivanju međunarodne naučnoistraživačke saradnje i ostvarivanje naučnoistraživačke saradnje u Kantonu i Bosni i Hercegovini,
- finansiranje naučnoistraživačke djelatnosti,
- formiranje Savjeta za nauku Kantona Sarajevo,
- informacioni sistem i vođenje evidencija u vezi sa obavljanjem naučnoistraživačke djelatnosti,
- opća pitanja u vezi sa osnivanjem naučnoistraživačkih instituta kao organizacionih i podorganizacionih jedinica visokoškolskih ustanova i naučnoistraživačkih instituta kao ustanova,
- prava i obaveze nadležnih organa u oblasti naučnoistraživačke djelatnosti,
- nadzor nad provedbom ovog zakona i
- druga pitanja od značaja za obavljanje naučnoistraživačke djelatnosti na području Kantona.

Pravno-tehnički, prijedlog Zakona je pripremljen u skladu sa Pravilima i postupcima za izradu zakona i drugih propisa u Federaciji Bosne i Hercegovine, te u skladu sa Uredbom o postupku i načinu pripremanja, izrade i dostavljanja propisa.

IV – OBRAZLOŽENJE POJEDINIH DIJELOVA ZAKONA

DIO PRVI - OSNOVNE ODREDBE

Čl. 1., 2., 3., 4., 5., 6. i 7.

U ovom dijelu zakona precizirano je značenje naučnoistraživačke djelatnosti, značaj naučnog i tehnološkog razvoja za Kanton Sarajevo, precizirana naučnoistraživačka djelatnost kao djelatnost od posebnog društvenog interesa za Kanton Sarajevo kroz definisanje načina ostvarenja tog interesa.

Dalje, u tekst Zakona ugrađeni su principi na kojima se zasniva naučnoistraživačka djelatnost te sloboda naučnog rada i djelovanja. Precizirano je koji su to rezultati naučnoistraživačkog rada, kao i ostvarivanje naučnoistraživačke djelatnosti kroz povezivanje osnovnog (fundamentalnog), primijenjenog (aplikativnog) i razvojnog istraživanja te osposobljavanjem kadra za obavljanje naučnoistraživačke djelatnosti.

DIO DRUGI – PODRŠKA NAUČNOISTRAŽIVAČKOJ DJELATNOSTI

Član 8.

U ovom dijelu zakona utvrđeno je osiguranje sredstava za podršku naučnoistraživačkoj djelatnosti 2% Budžeta Kantona i iz drugih izvora u skladu sa zakonom, 5% od izdvojenih

sredstava iz Budžeta Kantona namijenjena su za podršku projektima koji su od posebnog interesa za Kanton, način utroška sredstava i to u skladu sa Strategijom razvoja nauke Kantona Sarajevo, utvrđivanje kriterija za utrošak sredstava. Takođe je utvrđeno da se sredstva iz Budžeta Kantona koriste za ulaganje u osposobljavanje kadrova za naučni i istraživački rad, usavršavanje naučnoistraživačkog osoblja, za razvoj i uvođenje nove naučnoistraživačke infrastrukture te poticanje naučnoistraživačkih i istraživačkorazvojnih projekata od interesa za Kanton i razvoj naučnoistraživačke djelatnosti u skladu sa ovim zakonom.

DIO TREĆI – STRATEGIJA ZA RAZVOJ NAUKE

Čl. 9., 10. i 11.

U ovom dijelu zakona utvrđeno je donošenje Strategije za razvoj nauke svakih pet godina, a u svrhu ostvarivanja strateških ciljeva, definiranja smjernica i prioriteta naučnog i tehnološkog razvoja Kantona i Bosne i Hercegovine, odnosno ostvarivanja posebnog interesa u naučnoistraživačkoj djelatnosti. Strategija razvoja nauke sadrži osnovne principe, ciljeve, smjernice i prioritete naučnog i tehnološkog razvoja. Strategiju za razvoj nauke donosi Skupština Kantona Sarajevo na prijedlog Vlade. Nacrt Strategije za razvoj nauke priprema Savjet za nauku i dostavlja ga Ministarstvu.

DIO ČETVRTI – SAVJET ZA NAUKU

Čl. 11., 12., 13. i 14.

U ovom dijelu zakona propisano je osnivanje i rad Savjeta za nauku kao stručnog i savjetodavnog tijela Ministarstva, a ciljem praćenja i unapređenja stanja u oblasti nauke i tehnologije u Kantonu, podnošenje izvještaja o radu Savjeta i stanju u oblasti naučnoistraživačkog rada. Članove Savjeta za nauku imenuje ministar na period od četiri godine, uz mogućnost ponovnog imenovanja. U ovom dijelu takođe je utvrđen sastav i nadležnosti Savjeta, način imenovanja i razrješenja predsjednika i članova Savjeta.

DIO PETI – NOSIOCI NAUČNOISTRAŽIVAČKE DJELATNOSTI I POSTUPAK OSNIVANJA

Čl. 15., 16., 17., 18. i 19.

U ovom dijelu zakona utvrđeni su nosioci naučnoistraživačke djelatnosti na području Kantona i postupak osnivanja naučnoistraživačkih instituta kao organizacionih jedinica u okviru visokoškolske ustanove na području Kantona.

Takođe je definisan postupak osnivanja naučnoistraživačkih instituta kao ustanova, uslovi za osnivanje naučnoistraživačkog instituta, rokovi za donošenje odluke po podnesenom zahtjevu za osnivanje, rad ekspertne komisije, rad komisije matičara kao i nadležnost Vlade i

Skupštine u postupku osnivanja, rad stručne komisije i postupak provjere ispunjenosti uslova za početak rada i daljnji rad naučnoistraživačkih instituta kao ustanova, kao i postupak upisa i brisanja iz Registra naučnoistraživačkih subjekata na području Kantona Sarajevo koji vodi Ministarstvo.

Napominjemo da ove procedure nisu definisane trenutno važećim Zakonom o naučnoistraživačkoj djelatnosti.

DIO ŠESTI – NAUČNOISTRAŽIVAČKO OSOBLJE

Čl. 20., 21., 22., 23., 24., 25., 26., 27., 28., 29., 30., 31., 32. i 33.

U ovom dijelu zakona utvrđena su naučna i istraživačka zvanja u smislu ovog Zakona, pravo sudjelovanja naučnoistraživačkog osoblja koje je izabrano na osnovu ovog Zakona u realizaciji nastavnog procesa na visokoškolskoj ustanovi i sudjelovanju u radu komisija.

Tim licima se za vrijeme trajanja angažmana, bez priznavanja naučnoistraživačkog zvanja kao akademskog zvanja dodijeljenog shodno odredbama Zakona o visokom obrazovanju, priznaje samo uživanje prava članova akademskog osoblja u vezi sa izvođenjem nastavnog procesa odnosno rada u komisiji, i to:

- a) stručnom saradniku priznaju se prava asistenta,
- b) višem stručnom saradniku priznaju se prava višeg asistenta,
- c) stručnom savjetniku priznaju se prava višeg asistenta u drugom izbornom periodu, pod uslovom da je stekao stepen doktora nauka,
- d) naučnom saradniku priznaju se prava docenta,
- e) višem naučnom saradniku priznaju se prava vanrednog profesora,
- f) naučnom savjetniku priznaju se prava redovnog profesora.

Takođe, definisani su načini i uslovi oduzimanja naučnoistraživačkog zvanja, kao i procedura odnosno pokretanje postupka za oduzimanje naučnoistraživačkog zvanja.

Dalje, utvrđen je sastav vijeća, kao i procedura, uslovi i postupak izbora direktora naučnoistraživačkog instituta, kao i slučajeve kada se ne izvrši izbor direktora naučnoistraživačkog instituta, odnosno imenovanje vršioca dužnosti direktora.

Utvrđeno je kada direktoru naučnoistraživačkog instituta prestaje mandat, kao i procedura razrješenja direktora.

U ovom dijelu takođe je propisana procedura izbora naučnoistraživačkog osoblja u naučna i istraživačka zvanja na organizacionoj jedinici u okviru visokoškolske ustanove, kao i izbor u naučna i istraživačka zvanja u okviru naučnoistraživačkog instituta kao ustanove koji se vrši u svim slučajevima javnim konkursom, u skladu sa kriterijima utvrđenim ovim zakonom, statutom i pravilnikom kojim se utvrđuju općeprihvaćeni standardi u datoj oblasti.

Definisani su minimalni uslovi za izbor u naučna i istraživačka zvanja (stručni saradnik, viši stručni saradnik, stručni savjetnik, naučni saradnik, viši naučni saradnik, naučni savjetnik).

Odlukom ministra, a na prijedlog Savjeta za nauku, definisat će se poseban status jezika, književnosti, historije, kulture i umjetnosti te druge naučne/umjetničke oblasti od posebnog značaja za Bosnu i Hercegovinu te utvrditi dodatni kriteriji za izbor u naučna i istraživačka zvanja.

Takođe, propisan je period izbora, istek izbornog perioda, ugovor o radu i statusna pitanja naučnoistraživačkog osoblja.

Napominjemo da ove procedure nisu u potpunosti definisane trenutno važećim Zakonom o naučnoistraživačkoj djelatnosti niti su usaglašene sa Zakonom o visokom obrazovanju.

DIO SEDMI - NADZOR

Čl. 34. i 35.

U ovom dijelu zakona precizno je propisan je način vršenja nadzora nad provođenjem ovog zakona i propisa donesenih na osnovu ovog zakona, obaveze odgovornih tijela naučnoistraživačkog instituta kao organizacione jedinice ili ustanove dostavljanja svih traženih informacije i dokumenata potrebnih za izvršavanje nadležnosti.

Važna činjenica je da je ovim zakonom uveden inspekcijski nadzor nad provođenjem ovog zakona, provedbenih propisa, kao i akata i odluka tijela/organa naučnoistraživačkog instituta kao organizacione jedinice ili ustanove donesenih u cilju izvršenja obaveza utvrđenih ovim zakonom.

Trenutno važećim Zakonom nijedna inspekcija nije imala nadležnost za kontrolisanje naučnih ustanova.

Kada nadležna inspekcija utvrdi nepravilnosti u radu koje ne sprečavaju dalji rad naučnoistraživačkog instituta kao organizacione jedinice ili ustanove odnosno kada utvrdi da isti ne postupa ili postupa nepravilno ili nepotpuno prema obavezama koje su joj određene propisima, obavezna je prema utvrđenom činjeničnom stanju naložiti odgovarajuće upravne mjere, koje su sada detaljno propisane.

DIO OSMI - KAZNE NE ODREDBE

Član 36.

U ovom dijelu zakona propisane su novčane kazne za prekršaj naučnoistraživački institut kao organizaciona jedinica ili ustanova, odgovorno lice naučnoistraživačkog instituta kao organizacione jedinice ili ustanove, te novčane kazne za prekršaje za odgovorno lice za zastupanje naučnoistraživačkog instituta kao organizacione jedinice ili ustanove u pravnom prometu.

Napominjemo da ova pitanja nisu riješena trenutno važećim Zakonom o naučnoistraživačkoj djelatnosti.

DIO DEVETI - PRELAZNE I ZAVRŠNE ODREDBE

Čl. 37., 38. i 39.

U ovom dijelu zakona propisane su implementacijske mjere i nastavak rada, rokovi za donošenje akata u smislu ovog zakona, postupak izbora u naučna i istraživačka zvanja koja su započeta prema odredbama propisa koji su važili prije stupanja na snagu ovog zakona, pitanja izbora u isto ili više zvanje, postupak izbora naučnoistraživačkog osoblja koje je birano u zvanje prema odredbama zakona koji stupanjem na snagu ovog zakona prestaje da važi, a koje se nalazi u prvom izbornom periodu.

Ministarstvo će u roku od 60 dana od dana stupanja na snagu ovog zakona donijeti Pravilnik o klasifikaciji naučnih oblasti, polja i grana uz prethodno provedene konsultacije sa visokoškolskim ustanovama na području Kantona Sarajevo, kao i pravilnik o postupku upisa i brisanja iz Registra naučnoistraživačkih subjekata na području Kantona Sarajevo.

Danom stupanja na snagu ovog zakona prestaje primjena Zakona o naučnoistraživačkoj djelatnosti („Službene novine Kantona Sarajevo“, broj: 10/04). Ovaj zakon stupa na snagu osmog dana od dana objavljivanja u “Službenim novinama Kantona Sarajevo”.

V - FINANSIJSKA SREDSTVA ZA PROVOĐENJE OVOG ZAKONA

Za provođenje ovog zakona nisu potrebna dodatna finansijska sredstva. Članom 12. Zakona predviđeno je uspostavljanje Savjeta za nauku Kantona Sarajevo, koje u skladu sa stavom (9) istog člana ima pravo na mjesečnu naknadu u zavisnosti od provedenih aktivnosti i ostvarenih rezultata na realizaciji poslova iz nadležnosti Savjeta za nauku. Ministar će iznos naknade utvrđivati odlukom, a isplata će se vršiti iz sredstava ovog ministarstva sa pozicije ugovorenih usluga.

Napominjemo da su u Budžetu Kantona Sarajevo za 2016. godinu na poziciji 614300 LAN011- Transfer za visoko obrazovanje predviđena sredstva u iznosu od 66.144.000 KM (sufinansiranje/finansiranje djelatnosti Univerziteta u Sarajevu), dok su na poziciji 614300 LAN011 – Transfer za nauku predviđena sredstava u iznosu od 4.300.000 KM (sufinansiranje/finansiranje naučnih instituta i Akademije nauka i umjetnosti BiH. Na poziciji 614300 NOV Programi nauke predviđena su sredstva u iznosu od 283.000 KM za sufinansiranje programa nauke (podrška realizaciji naučnih projekata).

PRIMJEDBE I PRIJEDLOZI NA NACRT ZAKONA O NAUČNOISTRAŽIVAČKOJ DJELATNOSTI PRISTIGLI U TOKU JAVNE RASPRAVE

Napomena: Shodno Zaključku Skupštine Kantona Sarajevo, broj: 01-02-2883/16 od 01.02.2016. godine, dostavljene amnadmane na nacrt Zakona, Ministarstvo za obrazovanje, nauku i mlade Kantona Sarajevo tretiralo je kao primjedbe i prijedloge.

U toku javne rasprave pristiglo je ukupno 13 primjedbi/prijedloga na nacrt Zakona, od kojih:

- pet primjedbi/prijedloga Ministarstvo je prihvatilo/usvojilo kao osnovano;
- osam primjedbi/prijedloga Ministarstvo nije prihvatilo/usvojilo (uz obrazloženje).

U nastavku je pregled dostavljenih primjedbi/prijedloga na pojedine članove nacrtu Zakona uz stav Ministarstva i obrazloženje te prijedlog stava Vlade:

Član 8.

(Osiguranje finansijskih sredstava za naučnoistraživačku djelatnost)

- (1) Sredstva za podršku naučnoistraživačkoj djelatnosti u smislu ovog zakona osiguravaju se u godišnjem iznosu do 2% Budžeta Kantona te i iz drugih izvora u skladu sa zakonom.
- (2) Sredstva iz stava (1) ovog člana biće utrošena u skladu Strategijom za razvoj nauke, a 5% od izdvojenih sredstava iz stava (1) ovog člana namijenjena su za podršku projektima koji su od posebnog interesa za Kanton.
- (3) Vlada Kantona Sarajevo (u daljnjem tekstu: Vlada), na prijedlog ministra za obrazovanje, nauku i mlade Kantona Sarajevo (u daljnjem tekstu: ministar), donosi odluku kojom se utvrđuju kriteriji za utrošak sredstava iz ovog člana.
- (4) Ministar prije utvrđivanja prijedloga odluke iz stava (3) ovog člana provodi konsultacije sa Savjetom za nauku.
- (5) Sredstva iz stava (1) ovog člana, izuzev sredstava rezerviranih u skladu sa stavom (2) ovog člana, koriste se za ulaganje u osposobljavanje kadrova za naučni i istraživački rad, usavršavanje naučnoistraživačkog osoblja, za razvoj i uvođenje nove naučnoistraživačke infrastrukture te poticanje naučnoistraživačkih i istraživačkorazvojnih projekata od interesa za Kanton i razvoj naučnoistraživačke djelatnosti u skladu sa ovim zakonom.
- (6) Za namjene iz stava (5) ovog člana sredstva se, u skladu sa odlukom iz stava (3) ovog člana dodjeljuju u postupku javnog oglašavanja od strane Ministarstva za obrazovanje, nauku i mlade Kantona Sarajevo (u daljnjem tekstu: Ministarstvo).
- (7) Godišnji izvještaj o utrošku sredstava za razvoj naučnoistraživačke djelatnosti odobrenih u Budžetu Kantona u skladu sa ovim zakonom Ministarstvo podnosi Vladi.

AMANDMAN 1. MARIO VUKASOVIĆ

Član 8. Stav (1) glasi :

(1) Sredstva za podršku naučnoistraživačkoj djelatnosti u smislu ovog zakona osiguravaju se u godišnjem iznosu do 2% Budžeta Kantona te i iz drugih izvora u skladu sa zakonom.

Navedeni stav se mijenja i glasi:

(1) Sredstva za podršku naučnoistraživačkoj djelatnosti u smislu ovog zakona osiguravaju se u godišnjem iznosu **od najmanje 2% Budžeta Kantona** te i iz drugih izvora u skladu sa zakonom.

STAV MINISTARSTVA: Amandman se ne prihvata.

S obzirom da je već usvojen Budžet Kantona Sarajevo za 2016. godinu to nije moguće izmijeniti ovu odredbu Zakona u skladu sa predloženim amandmanom.

STAV VLADE: Prihvata se obrazloženje Ministarstva. Amandman se ne prihvata.

AMANDMAN 2. MARIO VUKASOVIĆ

Clan 8. Stav (3) glasi:

(3) Vlada Kantona Sarajevo (u daljnjem tekstu: Vlada), na prijedlog ministra za obrazovanje, nauku i mlade Kantona Sarajevo (u daljnjem tekstu: ministar), donosi odluku kojom se utvrđuju kriteriji za utrosak sredstava iz ovog clana.

Navedeni stav se mijenja i glasi:

(3) Vlada Kantona Sarajevo (u daljnjem tekstu: Vlada), na prijedlog ministra za obrazovanje, nauku i mlade Kantona Sarajevo (u daljnjem tekstu: ministar) **i Savjeta za nauku**, donosi odluku kojom se utvrđuju kriteriji za utrosak sredstava iz ovog clana.

STAV MINISTARSTVA: Amandman se djelimično prihvata.

S obzirom da Savjet za nauku nije ovlašten predlagati odluku koju donosi Vlada, Ministarstvo predlaže da se ovom odredbom predvidi da je Ministarstvo obavezno prethodno pribaviti mišljenje Savjeta za nauku u odnosu na odluku koju predlaže Vladi na usvajanje.

S tim u vezi, ova odredba mijenja se i glasi:

“(3) Vlada Kantona Sarajevo (u daljnjem tekstu: Vlada), na prijedlog ministra za obrazovanje, nauku i mlade Kantona Sarajevo (u daljnjem tekstu: ministar) uz prethodno pribavljeno mišljenje Savjeta za nauku, donosi odluku kojom se utvrđuju kriteriji za utrošak sredstava iz ovog člana.”

STAV VLADE: Prihvata se obrazloženje Ministarstva. Amandman se djelimično prihvata.

Član 10.

(Izrada i usvajanje Strategije za razvoj nauke)

- (1) Nacrt Strategije za razvoj nauke priprema Savjet za nauku i dostavlja ga Ministarstvu.
- (2) Strategiju za razvoj nauke donosi Skupština Kantona Sarajevo (u daljnjem tekstu: Skupština) na prijedlog Vlade.

AMANDMAN 3. MARIO VUKASOVIĆ

U članu 10. dodati novi stav (3). koji glasi :

(3) Savjet za nauku priprema Strategiju i dostavlja ga Ministarstvu u roku od 6 mjeseci od dana imenovanja Savjeta.

STAV MINISTARSTVA: Amandman se ne prihvata.

Predloženi amandman se ne prihvata jer je rok za donošenje Strategije utvrđen u članu 36. stav (1) ovog Zakona (uz neznatnu razliku od predložene ovim amandmanom).

STAV VLADE: Prihvata se obrazloženje Ministarstva. Amandman se ne prihvata.

Član 12.

(Imenovanje Savjeta za nauku)

- (1) Članove Savjeta za nauku imenuje ministar.

- (2) Za predsjednika Savjeta za nauku imenuje se kandidat sa zvanjem doktora nauka koji posjeduje iskustvo u multidisciplinarnim istraživanjima i međunarodno prepoznate reference i iskustvo u naučnoistraživačkoj djelatnosti i djelatnosti visokog obrazovanja.
- (3) Članovi Savjeta za nauku imenuju se na period od četiri godine, uz mogućnost ponovnog imenovanja.
- (4) Odlukom ministra o osnivanju Savjeta za nauku preciznije se utvrđuje sastav, mandat, prava, obaveze, naknada za rad te druga pitanja značajna za rad Savjeta za nauku.
- (5) Savjet se sastoji od devet članova i to:
 - a) osam članova istaknutih naučnih radnika sa akreditovane visokoškolske ustanove ili naučnog instituta registrovanog na području Kantona, pri čemu se vodi računa o zastupljenosti temeljnih naučnih oblasti;
 - b) istaknuti privrednik sa područja Kantona.
- (6) Predsjednika Savjeta za nauku imenuje i razrješava ministar, a članovi glasanjem određuju jednog od članova za zamjenika predsjednika Savjeta za nauku.
- (7) Mandat zamjenika predsjednika prati mandat predsjednika Savjeta za nauku.
- (8) Član Savjeta za nauku ne može biti rektor i prorektor univerziteta, dekan i prodekan organizacione jedinice univerziteta, direktor naučnoistraživačkog instituta kao ustanove i direktor visoke škole.
- (9) Članovi Savjeta za nauku imaju pravo na mjesečnu naknadu u zavisnosti od provedenih aktivnosti i ostvarenih rezultata na realizaciji poslova iz nadležnosti Savjeta za nauku.
- (10) Odluku o iznosu naknade donosi ministar.
- (11) Poslovníkom o radu utvrđuje se način rada, sazivanje sjednica, odlučivanje i druga pitanja bitna za rad Savjeta za nauku.
- (12) Administrativne poslove za potrebe Savjeta za nauku obavlja sektor za oblast visokog obrazovanja i nauke u sastavu Ministarstva.

AMANDMAN 4. MARIO VUKASOVIĆ

Član 13. Stav (1) glasi :

(1) Članove Savjeta za nauku imenuje ministar

Navedeni stav se mijenja i glasi :

(1) Članove Savjeta za nauku imenuje ministar u roku od tri mjeseca od dana stupanja na snagu Zakona.

STAV MINISTARSTVA: Amandman se prihvata.

Predloženi amandman se odnosi na član 12. stav (1) Zakona. Ministarstvo smatra svrsishodnim utvrditi rok za imenovanje Savjeta za nauku.

STAV VLADE: Prihvata se obrazloženje Ministarstva. Amandman se prihvata.

Član 15.

(Nosioci naučnoistraživačke djelatnosti)

Naučnu i istraživačku djelatnost na području Kantona obavljaju:

- a) Univerzitet u Sarajevu sa organizacionim jedinicama;
- b) visokoškolske ustanove kao ustanove sa organizacionim jedinicama registrovane na području Kantona;
- c) naučnoistraživački instituti kao ustanove registrovani na području Kantona;
- d) akademsko i naučnoistraživačko osoblje upisano u Registar iz člana 19. stav (7) ovog zakona;
- e) Akademija nauka i umjetnosti Bosne i Hercegovine.

AMANDMAN 5. MARIO VUKASOVIĆ

Član 15. glasi :

Naucnu i istraživačku djelatnost na području Kantona obavljaju:

- a) Univerzitet u Sarajevu sa organizacionim jedinicama;
- b) Visokoskolske ustanove sa organizacionim jedinicama registrovane na području Kantona;
- c) Naucnoistraživački instituti kao ustanove registrovani na području Kantona;
- d) Akademsko i naucnoistraživačko osoblje upisano u Registar iz člana 19. stav (7) ovog zakona;
- e) Akademija nauka i umjetnosti Bosne i Hercegovine.

Navedeni član se mijenja i glasi :

Naucnu i istraživačku djelatnost na području Kantona obavljaju:

- a) Univerzitet u Sarajevu sa organizacionim jedinicama;
- b) **Akreditovane** visokoskolske ustanove sa organizacionim jedinicama registrovane na području Kantona;
- c) Naucnoistraživački instituti kao ustanove registrovani na području Kantona;
- d) Akademsko i naucnoistraživačko osoblje upisano u Registar iz člana 19. stav (7) ovog zakona;
- e) Akademija nauka i umjetnosti Bosne i Hercegovine.

Potrebno je utvrditi da samo one visokoskolske ustanove koje su akreditovane spadaju pod ovaj Zakon.

STAV MINISTARSTVA: Amandman se prihvata

S tim u vezi član 15. tačka b) mijenja se i glasi:

“b) akreditovane visokoškolske ustanove sa organizacionim jedinicama registrovane na području Kantona;”

STAV VLADE: Amandman se prihvata.

Član 16. (Postupak osnivanja)

- (1) Postupak osnivanja naučnoistraživačkih instituta kao organizacionih jedinica u okviru visokoškolske ustanove na području Kantona obavlja se na način i u postupku propisanim Zakonom o visokom obrazovanju.
- (2) Postupak osnivanja naučnoistraživačkih instituta kao ustanova vrši se na način propisan ovim zakonom.
- (3) Uslovi za osnivanje naučnoistraživačkog instituta iz st. (1) i (2) ovog člana propisani su ovim zakonom.
- (4) Osnivač naučnoistraživačkog instituta kao ustanove Ministarstvu podnosi zahtjev za osnivanje, uz koji obavezno prilaže elaborat o opravdanosti osnivanja, prijedlog statuta te dokaz o uplati sredstava u iznosu utvrđenom Odlukom Vlade za potrebe troškova vođenja postupka osnivanja od faze podnošenja zahtjeva do okončanja postupka po zahtjevu.
- (5) Elaborat o opravdanosti osnivanja naučnoistraživačkog instituta obavezno sadrži: podatke o osnivaču, sjedište i naziv, ciljeve, opis i preciznu razradu djelatnosti, detaljan opis djelokruga rada, kadrovsku i infrastrukturnu opremljenost i način obezbjeđenja finansijskih sredstava za početak i daljnji rad naučnoistraživačkog instituta.

- (6) Nakon dostavljanja urednog zahtjeva iz stava (4) ovog člana, Ministarstvo imenuje ekspertnu komisiju radi razmatranja zahtjeva i davanja stručnog mišljenja o usklađenosti elaborata u skladu sa odredbama ovog zakona.
- (7) Akt o imenovanju ekspertne komisije iz stava (6) ovog člana obavezno sadrži opis poslova i zadataka, rok za izvršenje povjerenih poslova i zadataka, kao i druga pitanja relevantna za rad.
- (8) U postupku osnivanja naučnoistraživačkog instituta kao ustanove podnosilac zahtjeva je obavezan ispred zvaničnog naziva instituta dodati odrednicu „Naučnoistraživački institut“.

PRIJEDLOG 1. INGEB

Iza člana 16. dodati novi član (16a ili 17) koji glasi:

Član 16a (Naučno-tehnološki parkovi)

- 1) Naučno-tehnološki parkovi su privredna društva čiji je cilj komercijalizacija naučnih rezultata, poticanje saradnje između naučnog i privrednog sektora, a radi podsticanja poduzetništva.
- 2) Osnivaju se na zahtjev univerziteta ili instituta, samostalno ili u saradnji sa privrednim partnerima.
- 3) Saglasnost za osnivanje naučno-tehnološkog parka daje Vlada Kantona Sarajevo/Skupština Kantona Sarajevo na prijedlog Savjeta za nauku.

OBRAZLOZENJE

Naučno-tehnološki parkovi su najbolji način za transfer nauke i tehnologije u privredni sektor. Svi zakoni o naučnoistraživačkoj djelatnosti u BiH i regionu imaju „ugradenu“ mogućnost osnivanja naučno-tehnoloških parkova. U slučaju našeg prijedloga, osnivaju ga univerziteti i instituti u skladu sa zakonom. Saglasnost za osnivanje naučno-tehnološkog parka daje Vlada Kantona Sarajevo (ili druga opcija Skupština Kantona Sarajevo) na prijedlog Savjeta za nauku.

Na ovaj način se prati stalna tendencija zemalja EU i regiona ka aplikativnoj primjeni znanja i tehnologije u cilju podizanja privredne konkurentnosti. Ako je potrebno, način osnivanja naučno-tehnoloških parkova može biti regulisano odgovarajućim pravilnikom. Privredno je društvo, što znači da ga Kanton Sarajevo nije obavezan uopće finansirati, već je kompletno finansiranje obaveza univerziteta ili instituta koji pokreće proces osnivanja naučno-tehnološkog parka.

STAV MINISTARSTVA: Prijedlog se ne prihvata.

Predmetno pitanje već je riješeno članom 43. Statuta Univerziteta u Sarajevu, a imajući u vidu da je Institut za genetičko inženjerstvo i biotehnologiju organizaciona jedinica Univerziteta u Sarajevu, prijedlog se ne prihvata.

STAV VLADE: Prihvata se obrazloženje Ministarstva. Prijedlog se ne prihvata.

Član 18.

(Odluka Skupštine i rad komisije matičara)

- (1) Odluka Skupštine o zahtjevu osnivača, mora biti donesena najkasnije u roku od šest mjeseci od dana podnošenja Ministarstvu urednog zahtjeva iz člana 16. stav (4) ovog zakona.
- (2) Odluka Skupštine iz stava (1) ovog člana je konačna i putem Ministarstva dostavlja se osnivaču.

- (3) Nakon što Skupština donese odluku kojom se daje saglasnost za osnivanje naučnoistraživačkog instituta kao ustanove, osnivač imenuje komisiju matičara, čiji sastav treba biti u skladu sa odredbama ovog zakona koje se odnose na izbor u naučna i istraživačka zvanja, koja obavlja sljedeće poslove:
- donosi statut;
 - objavljuje konkurs i vrši izbor u naučna i istraživačka zvanja u skladu sa zakonom;
 - objavljuje konkurs za izbor i imenovanje direktora;
 - objavljuje konkurs i vrši izbor članova upravnog i nadzornog odbora naučnoistraživačkog instituta kao ustanove;
 - preduzima ostale potrebne aktivnosti u procesu ispunjavanja uslova neophodnih za početak rada i daljnji rad naučnoistraživačkog instituta kao ustanove;
 - dostavlja osnivaču izvještaj o ispunjenosti uslova potrebnih za početak rada i daljnji rad naučnoistraživačkog instituta kao ustanove sa obrazloženim kalendarom aktivnosti i datumom početka rada.
- (4) Nakon što komisija matičara dostavi izvještaj da je izvršila zadatke iz stava (3) ovog člana, osnivač donosi akt o osnivanju naučnoistraživačkog instituta kao ustanove.

AMANDMAN 6. MARIO VUKASOVIĆ

Član 18. stav (1) glasi:

Odluka Skupštine o zahtjevu osnivača, mora biti donesena najkasnije u roku od šest mjeseci od dana podnošenja Ministarstvu urednog zahtjeva iz člana 16. stav (4) ovog zakona.

Navedeni član se mijenja i glasi:

Odluka Skupštine o zahtjevu osnivača, mora biti donesena najkasnije u **roku od četiri mjeseca** od dana podnošenja Ministarstvu urednog zahtjeva iz člana 16. stav (4) ovog zakona.

STAV MINISTARSTVA: Amandman se prihvata.

S tim u vezi, član 18. stav (1) mijenja se i glasi:

„(1) Odluka Skupštine o zahtjevu osnivača, mora biti donesena najkasnije u roku od četiri mjeseca od dana podnošenja Ministarstvu urednog zahtjeva iz člana 16. stav (4) ovog zakona.“

STAV VLADE: Amandman se prihvata.

Član 19.

(Provjera ispunjenosti uslova od strane stručne komisije)

- (1) Uz zahtjev za provjeru ispunjenosti uslova za početak rada i nastavak rada osnivač naučnoistraživačkog instituta kao ustanove Ministarstvu dostavlja:
- odluku Vlade i Skupštine o davanju saglasnosti na elaborat o opravdanosti osnivanja naučnoistraživačkog instituta kao ustanove;
 - odluku osnivača o osnivanju naučnoistraživačkog instituta kao ustanove;
 - usvojen statut;
 - dokaz da ima najmanje deset zaposlenika iz reda naučnoistraživačkog osoblja od kojih najmanje 30% zaposlenika sa stepenom doktora nauka i izborom u zvanje iz odgovarajuće naučne oblasti i najmanje 30% zaposlenika sa stepenom magistra i izborom u zvanje iz odgovarajuće naučne oblasti;

- e) dokaz da je imenovano vijeće naučnoistraživačkog instituta sastavljeno od najmanje pet članova od kojih najmanje 40% ima stepen doktora nauka i odgovarajući izbor u zvanje i 40% stepen magistra i odgovarajući izbor u zvanje;
 - f) dokaz da su izvršeni izbori u naučna i istraživačka zvanja u skladu sa ovim zakonom i statutom (ugovori o radu; prijava PIO/MIO);
 - g) dokaz da je za direktora imenovano lice sa stepenom doktora nauka;
 - h) dokaz da je osnivač obezbijedio prostor, opremu i sredstva u skladu sa elaboratom;
 - i) ispunjenost naprijed propisanih uslova od strane već osnovanih i novoosnovanih naučnoistraživačkih instituta vrši Ministarstvo svakih pet godina po proceduri koja je propisana ovim zakonom.
- (2) Ispunjenost uslova iz stava (1) ovog člana provjerava se kod osnivanja naučnoistraživačkih instituta kao organizacione jedinice u okviru visokoškolske ustanove i kod osnivanja naučnoistraživačkog instituta kao ustanove.
 - (3) Po zahtjevu iz stava (1) ovog člana Ministarstvo imenuje stručnu komisiju za provjeru ispunjenosti uslova za početak rada naučnoistraživačkog instituta kao ustanove.
 - (4) Stručnu komisiju iz stava (3) ovog člana, koja broji najmanje pet članova, imenuje Ministarstvo iz reda istaknutih naučnih radnika i stručnjaka iz odgovarajuće oblasti sadržane u elaboratu, predstavnika osnivača naučnoistraživačkog instituta kao ustanove te predstavnika Ministarstva.
 - (5) Stručna komisija iz stava (3) ovog člana razmatra zahtjev, procjenjuje dokaze i na licu mjesta vrši provjeru ispunjenosti uslova propisanih ovim zakonom i pravilnikom iz stava (8) ovog člana.
 - (6) Nakon što stručna komisija iz stava (3) ovog člana provede postupak u skladu sa rješenjem o imenovanju, podnosi izvještaj o svom radu ministru sa mišljenjem o ispunjenosti propisanih uslova za početak rada i daljnji rad i prijedlogom u odnosu na donošenje rješenja kojim se novoosnovanom naučnoistraživačkom institutu kao ustanovi dozvoljava početak rada.
 - (7) Na osnovu rješenja o ispunjenosti uslova za početak rada novoosnovani naučnoistraživački institut kao ustanova upisuje se u Registar naučnoistraživačkih subjekata na području Kantona Sarajevo (u daljnjem tekstu: Registar).
 - (8) Postupak upisa i brisanja iz Registra iz stava (7) ovog člana, kao i ostala pitanja bitna za postupak osnivanja i daljnji rad naučnoistraživačkog instituta kao ustanove uredit će se pravilnikom koji donosi ministar.
 - (9) Registar iz stava (7) ovog člana vodi Ministarstvo.
 - (10) Ako naučnoistraživački institut kao ustanovu osnivaju dva ili više osnivača, njihovi međusobni odnosi, prava, obaveze i odgovornosti uređuju se ugovorom, koji se zaključuje u pisanoj formi, u kojem slučaju se ugovor dostavlja uz zahtjev iz stava (1) ovog člana.

PRIMJEDBA 1. INSTITUT ZA HIDROTEHNIKU d.d. Sarajevo

“Clanovima 15-19. nacrta Zakona o naučnoistraživačkoj djelatnosti Kantona Sarajevo utvrđeni su nosioci naučnoistraživačke djelatnosti na području Kantona Sarajevo, uvjeti osnivanja naučnoistraživačkih instituta, rokovi za donošenje odluke o osnivanju..., te između ostalog i postupak provjere ispunjenosti uslova za početak rada i daljnji rad naučnoistraživačkih instituta kao ustanova i postupak upisa i brisanja iz Registra naučnoistraživačkih subjekata na području Kantona Sarajevo, koji će sukladno članu 36. stav 10. biti detaljnije definirani pravilnicima koje donosi Ministar. Kao jedan od razloga za donošenje Zakona se navodi da je „neophodno precizirati subjekte koji se mogu baviti naučnoistraživačkom djelatnošću, uz naglasak na pravna lica koja se osnivaju izvan visokoškolske ustanove“, što je veoma pozitivno, međutim smatramo da su članom 19. Nacrta zakona postavljeni niski kriteriji odnosno uvjeti za nastavak rada subjekata koji se

mogu baviti naučnoistraživačkom djelatnošću, a koji su osnovani izvan visokoskolske ustanove, kao što je uvjet najmanje 10 zaposlenika iz reda naučnoistraživačkog osoblja od kojih najmanje 30% zaposlenika sa stepenom doktora nauka i najmanje 30% zaposlenika sa stepenom magistra i odgovarajući izbor u zvanje. Smatramo da bi ovaj kriterij trebao biti poostren na način da subjekti koji se mogu baviti naučnoistraživačkom djelatnošću moraju imati najmanje 10 zaposlenika iz reda naučnoistraživačkog osoblja, sa punim ili nepunim radnim vremenom, od kojih najmanje 50% zaposlenika sa stepenom doktora nauka i najmanje 50% zaposlenika sa stepenom magistra i odgovarajući izbor u zvanje.”

STAV MINISTARSTVA: Primjedba se ne prihvata.

U članu 19. Stav (1) tačka i) ustanovljeno je da ispunjenost propisanih uslova od strane već osnovanih i novoosnovanih naučnoistraživačkih instituta vrši Ministarstvo svakih pet godina po proceduri koja je propisana ovim zakonom.

Takođe, ovaj zakon se ne odnosi na institute koji nisu osnaženi u skladu sa Zakonom o naučnoistraživačkoj djelatnosti i propisanim uslovima.

STAV VLADE: Prihvata se obrazloženje Ministarstva. Primjedba se ne prihvata.

PRIMJEDBA 2. SENIJA MILIŠIĆ

„Ovim nacrtom nije predviđen član koji bi deflnirao način formiranja vijeća naučnog instituta.

U članu 28 Zakona iz 2004. je stajalo da se savjet, odnosno slično stručno tijelo sastoji od najmanje pet članova, od kojih najmanje 40% ima naučni stepen doktora nauka, i najmanje 40% naučni stepen magistra nauka, te da „u pravilu navedeno tijelo čine članovi sa naučnim stepenom doktora nauka.”

Upravo ova formulacija „u pravilu” je zloupotrebljavana (primjer za to nalazimo u Institutu za historiju). Isto tako navedenim članom nije precizirano da li su to uposlenici Instituta ili mogu biti i vanjski članovi.

U aktu br. 0101-38-4265/14 od 18.11.2014. godine rektor Univerziteta u Sarajevu je direktoru Orijentalnog instituta dao mišljenje pod tackom 3. da „utvrdi saziv naučnog vijeća Instituta, u skladu sa čl. 28 Zakona o naučnoistraživačkoj djelatnosti KS, koji bi inkorporirao sve zaposlenike u punom radnom vremenu na Institutu koji imaju naučni stepen doktora nauka u sastav vijeća, te dovoljnog broja predstavnika zaposlenika u punom radnom vremenu na Institutu sa naučnim stepenom magistra nauka.”

Predlažem da se ovaj stav rektora ugradi u Zakon, što će reći da se ne ograničava broj članova naučnog vijeća, odnosno da svi uposlenici sa zvanjem doktora nauka budu članovi naučnog vijeća kao i odgovarajući broj predstavnika asistenata i magistara. (Na ovaj način će se manipulacije svesti na najmanju moguću mjeru).”

STAV MINISTARSTVA: Primjedba/prijedlog se prihvata.

Iza člana 21. dodaje se novi član 22. koji glasi:

“Član 22.
(Sastav vijeća)

Vijeće naučnoistraživačkog instituta čine svi zaposlenici u punom radnom vremenu u naučnoistraživačkom institutu koji imaju zvanje doktora nauka i zvanje magistra.”

Dosadašnji član 22. postaje član 23. itd.

STAV VLADE: Primjedba/prijedlog se prihvata.

PRIMJEDBA 3. ASOCIJACIJA ZA INTERKULTURALNE AKTIVNOSTI I SPASAVAJE NALSIJEDA U BIH/AIASN-A

Kada je riječ o kulturi, zasigurno niti jedna od postojećih institucija koje se bave naučno-istraživačkim radom, posebno ne muzeji i arhivi neće se moći registrirati, jer zbog prirode posla imaju više od 40% osoblja koje ne spada u kategoriju naučno-istraživačkog osoblja (30% +30%). Ovo iz razloga što se radi o malim institucijama koje ujedno obavljaju usluge za javnost tak oda imaju relativno dosta takve vrste osoblja. Naravno uvijek mogu osnovati posebna institut, ali onda nema ko da obavlja ovu oblast djelatnosti zbog koje su osnovani (Primjer može biti Zemaljski muzej koji ima preko 60 zaposlenih i trebao bi prema slovu predloženog Zakona imati najmanje 30-35 doktora nauka i magistara, što je neizvodljivo. Istina kanton nije osnivač ZM, ali ovo je primjer. Slično je sa Arhivom Sarajeva, Muzejom Sarajeva i t.d. S postovanjem

STAV MINISTARSTVA: Primjedba se ne prihvata.
Ovaj zakon se ne odnosi na ustanove iz oblasti kulture.

STAV VLADE: Prihvata se obrazloženje Ministarstva. Primjedba se ne prihvata.

Član 30.

(Minimalni uslovi za izbor u naučna i istraživačka zvanja)

- (1) Minimalni uslovi za izbor u naučna i istraživačka zvanja su:
 - a) stručni saradnik: odgovarajuća visoka stručna sprema iz oblasti za koju se bira sa prosječnom ocjenom najmanje 8 ili 3,5, pokazane naučnoistraživačke sposobnosti;
 - b) viši stručni saradnik: naučni stepen magistra iz oblasti za koju se bira sa prosječnom ocjenom najmanje 8 na postdiplomskom studiju ili stepen drugog ciklusa studija iz oblasti za koju se bira sa prosječnom ocjenom i na prvom i na drugom ciklusu studija najmanje 8 ili 3,5; pokazane naučnoistraživačke sposobnosti;
 - c) stručni savjetnik: naučno zvanje doktora iz oblasti za koju se bira ili stepen trećeg ciklusa studija iz oblasti za koju se bira sa prosječnom ocjenom na prvom, drugom i trećem ciklusu studija najmanje 8 ili 3,5; pokazane naučnoistraživačke sposobnosti;
 - d) naučni saradnik: naučno zvanje doktora iz oblasti za koju se bira ili stepen trećeg ciklusa studija iz oblasti za koju se bira sa prosječnom ocjenom na prvom, drugom i trećem ciklusu studija najmanje 8 ili 3,5; najmanje tri naučna rada iz oblasti za koju se bira objavljena u priznatim publikacijama; pokazane naučnoistraživačke sposobnosti;
 - e) viši naučni saradnik: proveden najmanje jedan izborni period u zvanju naučnog saradnika, najmanje pet naučnih radova iz oblasti za koju se bira objavljenih u priznatim publikacijama, objavljena naučna knjiga i originalni naučni uspjeh kao što je naučni projekt, patent ili originalni metod, sve nakon izbora u zvanje naučnog saradnika;
 - f) naučni savjetnik: proveden najmanje jedan izborni period u zvanju višeg naučnog saradnika, najmanje osam naučnih radova iz oblasti za koju se bira objavljenih u priznatim publikacijama, najmanje dvije objavljene naučne knjige i originalni naučni uspjeh kao što je naučni projekt, patent ili originalni metod, sve nakon izbora u zvanje višeg naučnog saradnika.
- (2) Odlukom ministra, a na prijedlog Savjeta za nauku, definisat će se poseban status jezika, književnosti, historije, kulture i umjetnosti te druge naučne/umjetničke oblasti od

posebnog značaja za Bosnu i Hercegovinu te utvrditi dodatni kriteriji za izbor u naučna i istraživačka zvanja.

- (3) Učešće naučnoistraživačkog osoblja u realizaciji naučnoistraživačkog projekta od posebnog interesa za Kanton, u postupku izbora u isto ili više zvanje, vrednuje se kao naučni projekt, patent ili originalni metod, s tim da član naučnoistraživačkog osoblja može u toku izbornog perioda ostvariti vrednovanje najviše dva naučnoistraživačka projekta.
- (4) Vrednovanje učešća naučnoistraživačkog osoblja u realizaciji naučnoistraživačkog projekta od posebnog interesa za Kanton posebnim aktom priznaje odnosno verificira Ministarstvo, a akt Ministarstva služi kao dokaz u postupku izbora naučnoistraživačkog osoblja u isto ili više zvanje.
- (5) Pod naučnom knjigom iz ovog člana smatra se naučna knjiga definisana Zakonom o visokom obrazovanju.

AMANDMAN 8. MARIO VUKASOVIĆ

U članu 30. dodaje se novi stav (6) koji glasi:

(6) Spisak priznatih publikacija koje se uzimaju kao validne prilikom izbora u naučna i istraživačka znanja utvrđuje Ministarstvo na prijedlog Savjeta za nauku.

STAV MINISTARSTVA: Amandman se ne prihvata.

Predmetno pitanje je riješeno u članu 36. stav (9) ovog zakona, dok je članom 13. ovog zakona ostavljena mogućnost da Ministarstvo, prije objavljivanja ovog spiska, zatraži mišljenje Savjeta za nauku. Za izradu spiska priznatih publikacija matične su visokoškolske ustanove.

STAV VLADE: Prihvata se obrazloženje Ministarstva. Amandman se ne prihvata.

Opšte primjedbe:

PRIMJEDBA 1: ASOCIJACIJA ZA INTERKULTURALNE AKTIVNOSTI I SPASAVAJE NALSIJEDA U BIH/AIASN-A

Poznato je da postoje privatne klinike, privatni fakulteti, privatne organizacije raznih oblika djelovna koje se bave i naučno-istraživačkim radom. i sl. Za očekivati je da bi mogli postojati i privatni naučno- istraživački instituti, upravo najviše na području Kantona Sarajevo. Koliko vidimo ovaj Prednacrt se ne odnosi na privatne (eventualno osnovane ili koje ce se osnovati) naučno-istraživačke institute /organizacije ,jer se iz materiala to jasno ne vidi .Ako se ne odnose,kako se njihov rad regulira ili je to ostavljeno "slobodnom trzistu"

STAV MINISTARSTVA: Primjedba se ne prihvata.

U članu 1. ovog zakona detaljno, jasno i precizno je utvrđen predmet Zakona, a u ostalim odredbama, između ostalog, utvrđen je rad, nadležnost, osnivanje i ostala bitna pitanja kako za već osnovane institute u okviru visokoškolskih ustanova tako i za institute kao ustanove koji će se eventualno osnovati u skladu sa ovim zakonom.

STAV VLADE: Prihvata se obrazloženje Ministarstva. Primjedba se ne prihvata.

PRIMJEDBA 2: INSTITUT ZA HIDROTEHNIKU d.d. SARAJEVO

Iz nacrtu je nejasno, obzirom da se ne spominju „druga pravna lica koja su registrirana za obavljanje naučnoistraživačke djelatnosti“, kao što je to slučaj sa važećim Zakonom o naučnoistraživačkoj djelatnosti Kantona Sarajevo iz 2004. Godine, već se koristi termin

ustanove i instituti, pa ostaje neuređeno i nejasno da li se pod ustanovama i institutima podrazumijevaju privredna društva za obavljanje naučnoistraživačke djelatnosti.

Molimo vas da razmotrite mogućnost za pronalaženje prostora u nacrtu navedenog zakona kojim bi se na poseban način tretirale naučnoistraživačke ustanove koje su osnovane izvan visokoškolskih ustanova, kao što su privredna društva, koja se nizom godina bave naučnoistraživačkim radom, te kroz različite međunarodne projekte ostvaruju međunarodnu naučnu saradnju. Na ovaj način bi se približili Evropskoj uniji u smislu stvaranja uvjeta za egzistiranje i društvenu priznatost različitih oblika organizovanja naučno-istraživačkog rada, kao npr. Centara, Centara izvrsnosti kao naučnoistraživačkih subjekata, te mnogih drugih oblika uobičajenih u Evropi, koji su osnovani izvan visokoškolskih ustanova, kako u Kantonu Sarajevo tako i šire.

STAV MINISTARSTVA: Primjedba se ne prihvata.

U članu 1. ovog zakona detaljno, jasno i precizno je utvrđen predmet Zakona, a u ostalim odredbama, između ostalog, utvrđen je rad, nadležnost, osnivanje i ostala bitna pitanja kako za već osnovane institute u okviru visokoškolskih ustanova kao javnih ustanova i kao ustanova, tako i za institute kao ustanove (tzv. privatni instituti) koji će se eventualno osnovati u skladu sa ovim zakonom.

Odredbe ovog zakona ne odnose se na institute koji nisu osnovani u skladu sa ovim zakonom i koji nisu upisani u Registar naučnoistraživačkih instituta koji su registrovani za obavljanje naučnoistraživačke djelatnosti na području Kantona Sarajevo.

STAV VLADE: Prihvata se obrazloženje Ministarstva. Primjedba se ne prihvata.



KANTON SARAJEVO
Ured za zakonodavstvo
Vlade Kantona Sarajevo

CANTON SARAJEVO
Office for legislature of Sarajevo Canton
Government

Broj: 09-02-11779/16
Sarajevo, 15.04.2016. godine

KANTON SARAJEVO
MINISTARSTVO ZA OBRAZOVANJE, NAUKU I MLADE

PREDMET: Stručno mišljenje na prijedlog Zakona o naučnoistraživačkoj djelatnosti.-

Na osnovu člana 2. Uredbe o Uredu za zakonodavstvo Vlade Kantona Sarajevo ("Službene novine Kantona Sarajevo", broj: 7/06-Prečišćeni tekst) i čl. 4. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", broj: 21/11-Novi prečišćeni tekst, 30/11-Ispravka i 23/15), Ured za zakonodavstvo Vlade Kantona Sarajevo, daje slijedeće


MIŠLJENJE

1. Ured za zakonodavstvo Vlade Kantona Sarajevo nema primjedbi na dostavljeni tekst prijedloga Zakona o naučnoistraživačkoj djelatnosti po pitanju njegove usklađenosti sa odredbama ustava, kao i pozitivno-pravnim propisima navedenim u obrazloženju predmetnog materijala.

2. Dostavljeni materijal je pripremljen u skladu sa Uredbom o postupku i načinu pripremanja, izrade i dostavljanja propisa ("Službene novine Kantona Sarajevo", broj: 21/11-Novi prečišćeni tekst, 30/11-Ispravka i 23/15), te se isti može razmatrati na jednoj od narednih sjednica Vlade Kantona Sarajevo.

Dostaviti:

1. Naslovu
2. Evidencija
3. Arhiva



SEKRETAR

Ahmed Ljubović, dipl.pravnik



web: <http://uz.ks.gov.ba>
e-mail: ured@ks.gov.ba
Tel/fax: +387-(0) 33 560-448
Sarajevo, Hamida Dizdara 1





Broj: 03-02-02-11777/16
Sarajevo, 15.04.2016. godine

KANTON SARAJEVO
MINISTARSTVO ZA OBRAZOVANJE, NAUKU I MLADE
gosp. Elvir Kazazović, ministar

**Predmet: Prijedlog Zakona o naučnoistraživačkoj djelatnosti, mišljenje –
veza Vaš akt broj:11/05-38-10558-5.1/15 od 07.04.2016. godine**

Postupajući po Vašem aktu broj i datum gornji, a na osnovu člana 7. Zakona o organizaciji i djelokrugu organa uprave i upravnih organizacija Kantona Sarajevo ("Službene novine Kantona Sarajevo", br. 2/12 Prečišćeni tekst, 41/12 i 8/15) i člana 4. stav 2. Uredbe o postupku i načinu pripremanja, izrade i dostavljanja propisa ("Službene novine Kantona Sarajevo", br. 21/11 Novi prečišćeni tekst, 30/11 i 23/15), Ministarstvo pravde i uprave razmotrilo je prijedlog ovog zakona i daje slijedeće

MIŠLJENJE

Prijedlog Zakona o naučnoistraživačkoj djelatnosti je propis kojim se ne povreduju prava zaštićena odredbama Evropske konvencije o zaštiti ljudskih prava i osnovnih sloboda, kao ni sa drugim pravnim aktima kojima se štite ljudska prava.

Takođe, konstatujemo da su primjedbe date u Mišljenju Ministarstva pravde i uprave broj: 03-04-02-31528/15 od 08.12.2015. godine na nacrt Zakona o naučnoistraživačkoj djelatnosti, uvažene i ugrađene u tekst dostavljenog prijedloga zakona.

S poštovanjem,

Dostaviti:
1. Naslovu
2. a/a



MINISTAR

Mario Nenadić



web: <http://mju.ks.gov.ba>
e-mail: pravda@ks.gov.ba

Tel: + 387 (0) 33 562-083, Fax: + 387 (0) 33 562-241
Sarajevo, Reisa Džemaludina Čauševića 1





Broj:08-03-02-11778/16
Sarajevo,22.12.2015. godine

**MINISTARSTVO ZA OBRAZOVANJE, NAUKU I MLADE
KANTONA SARAJEVO
O V D J E**

PREDMET:Mišljenje

Veza vaš broj: 11/05-38-10558-5.2/15 od 07.04.2016. godine

U skladu sa članom 3. Stav (4) Uredbe o postupku i načinu pripremanja, izrade i dostavljanja propisa („Službene novine Kantona Sarajevo“, br. 21/11- Novi prečišćeni tekst i 30/11), po zahtjevu Ministarstva za obrazovanje, nauku i mlade Kantona Sarajevo na Prijedlog zakona o naučnoistraživačkoj djelatnosti, dajemo slijedeće m i š l j e n j e :

Budžetom Kantona Sarajevo za 2016.godinu, u razdjelu Ministarstva za obrazovanje, nauku i mlade, na poziciji 614300 LAN011 Transfer za visoko obrazovanje planirana su sredstva u iznosu 66.140.000 KM, na poziciji 614300LAN012 Transfer za nauku (sufinansiranje/finansiranje naučnih instituta i Akademije nauka i umjetnosti) planirana su sredstva u iznosu 4.300.000 KM i na poziciji 614300LAN007 Program nauke planirana su sredstva u iznosu 283.000 KM.

Članom 8. Stav (1) Prijedloga zakona o naučnoistraživačkoj djelatnosti je propisano :“ Sredstva za podršku naučnoistraživačkoj djelatnosti u smislu ovog zakona osiguravaju se u godišnjem iznosu do 2% Budžeta Kantona te i iz drugih izvora u skladu sa zakonom.“

Ministarstvo finansija predlaže da se u Prijedlogu zakona o naučnoistraživačkoj djelatnosti izmjeni član 8. stav (1), te da glasi : „Sredstva za podršku naučnoistraživačkoj djelatnosti u smislu ovog zakona osiguravaju se u godišnjem iznosu do 2% planiranih prihoda bez primitaka Budžeta Kantona te i iz drugih izvora u skladu sa zakonom.“

Predloženu izmjenu je potrebno prihvatiti jer ukupna sredstva Budžeta Kantona obuhvataju pored prihoda i primitke u koje najvećim dijelom spadaju kreditna zaduženja koja su povremenog karaktera i na koja se plaća kamata.



MINISTAR
Jasmin Halebić
Jasmin Halebić

Dostaviti:

1. Naslov
 - 2.MF -Sektor za budžet
 - 3.a/a
- Pripremila- Avdić *Z*



web: <http://mf.ks.gov.ba>
e-mail: mf@mf.ks.gov.ba;
Tel: + 387 (0) 33 565-005, Cent.+ 387 (0) 33 565-000
Fax: + 387 (0) 33 565-052 i 565-048
Sarajevo, Maršala Tita 62





Na osnovu člana 140. Poslovnika Skupštine Kantona Sarajevo („Službene novine Kantona Sarajevo“ broj: 41/12 - Drugi novi prečišćen tekst, 15/13, 47/13 i 47/15), Skupština Kantona Sarajevo, na sjednici održanoj dana 01.02.2016. godine, donijela je slijedeći


ZAKLJUČAK

1. Utvrđuje se Nacrt zakona o naučnoistraživačkoj djelatnosti;
2. Javna rasprava održaće se u kantonalnim organima, jedinicama lokalne samouprave, naučnim i stručnim ustanova i trajaće **30 dana**.
3. Primjedbe, prijedlozi, sugestije zastupnika i mišljenja radnih tijela Skupštine dostavljaju se Vladi Kantona Sarajevo koja organizuje i provodi javnu raspravu.
4. Vlada Kantona Sarajevo dužna je da nakon provedene javne rasprave podnese Skupštini Izvještaj o rezultatima javne rasprave koji sadrži primjedbe, prijedloge i mišljenja, kao i da da obrazloženje razloga zbog kojih pojedine primjedbe, prijedlozi i mišljenja nisu prihvaćeni u pripremi Prijedloga zakona o naučnoistraživačkoj djelatnosti.

Broj:01-02-2883/16
01.02.2016. godine
SARAJEVO

PREDSJEDATELJICA
SKUPŠTINE KANTONA SARAJEVO


Prof. Ana Babić



Dr. Senija Milišić

viši naučni saradnik Instituta za istoriju

2. 11. 2018

6549

VLADA KANTONA SARAJEVO

Predmet: Nacrt Zakona o naučnoistraživačkoj djelatnosti KS-primjedbe.

Ovim nacrtom nije predviđen član koji bi definirao način formiranja vijeća naučnog instituta.

U članu 28 Zakona iz 2004. je stajalo da se savjet, odnosno slično stručno tijelo sastoji od najmanje pet članova, od kojih najmanje 40% ima naučni stepen doktora nauka, i najmanje 40% naučni stepen magistra nauka, te da „u pravilu navedeno tijelo čine članovi sa naučnim stepenom doktora nauka.“

Upravo ova formulacija „u pravilu“ je zloupotrebljavana (primjer za to nalazimo u Institutu za istoriju). Isto tako navedenim članom nije precizirano da li su to uposlenici Instituta ili mogu biti i vanjski članovi.

U aktu br. 0101-38-4265/14 od 18.11.2014. godine rektor Univerziteta u Sarajevu je direktoru Orijentalnog instituta dao mišljenje pod tačkom 3. da „**utvrdi saziv naučnog vijeća Instituta, u skladu sa čl. 28 Zakona o naučnoistraživačkoj djelatnosti KS, koji bi inkorporirao sve zaposlenike u punom radnom vremenu na Institutu koji imaju naučni stepen doktora nauka u sastav vijeća, te dovoljnog broja predstavnika zaposlenika u punom radnom vremenu na Institutu sa naučnim stepenom magistra nauka.**“

Predlažem da se ovaj stav rektora ugradi u Zakon, što će reći da se ne ograničava broj članova naučnog vijeća, odnosno da svi uposlenici sa zvanjem doktora nauka budu članovi naučnog

vijeća kao i odgovarajući broj predstavnika asistenata i magistara. (Na ovaj način će se manipulacije svesti na najmanju moguću mjeru).

S poštovanjem




Senija Milišić

u prilogu:

-odgovor rektora



Sarajevo, 18.11.2014. godine
br. 0101-33-4265/14



UNIVERZITET U SARAJEVU
ORIJENTALNI INSTITUT
n.p. DIREKTOR
dr.sci. Adnan Kadrić

Predmet: Odgovor- traži se

Poštovani dr. Kadrić,

Na osnovu Vašeg dopisa br. 02-296/14 od 20.10.2014. godine naslovljenog na generalnog sekretara Univerziteta u Sarajevu dr.Suvada Konakovića u kojem tražite stav i prijedlog rektotrata u pogledu sastava Naučnog vijeća Instituta, imajući u vidu status Orijeentalnog instituta, kao redovne članice Univerziteta u Sarajevu, a na osnovu uvida u odredbe Zakona o visokom obrazovanju Kantona Sarajevo-prečišćeni tekst (Službene novine KS br. 42/13), Statuta Univerziteta u Sarajevu, Okvirnog plana rada Upravnog odbora integrisanog Univerziteta u Sarajevu od 15.05.2014. godine i mišljenja Odbora za normativna pitanja usvojenog na sjednici Senata od 25.06.2014. godine dajemo slijedeći:


PRIJEDLOG

1. Pristupiti izradi općeg akta (Pravilnik) o unutrašnjem ustrojstvu i organizaciji rada Instituta, u skladu sa Okvirnim planom rada Upravnog odbora Univerziteta u Sarajevu od 15.05.2014. godine, a na način i po proceduri koju je Odbor za normativna pitanja Univerziteta u Sarajevu predložio a Senat Univerziteta u Sarajevu usvojio na svojoj sjednici od 10.07.2014. godine ;
2. Do okončanja procedure donošenja općeg akta o unutrašnjem ustrojstvu i organizaciji rada, Naučno vijeće Instituta može, u skladu sa članom 93. (2) c) Statuta donijeti Poslovnik o radu naučnog vijeća instituta;

3. Predmetnim Poslovníkom može se utvrditi saziv naučnog vijeća Instituta, u skladu sa članom 28. Zakona o naučnoistraživačkoj djelatnosti KS, koji bi inkorporirao sve zaposlenike u punom radnom vremenu na Institutu a koji imaju naučni stepen doktora nauka u sastav vijeća, te dovoljnog broja predstavnika zaposlenika u punom radnom vremenu na Institutu sa naučnim stepenom magistra nauka;
4. Gore navedeni Poslovník o radu naučnog vijeća Instituta trebao bi u svojim prelaznim i završnim odredbama sadržavati odredbu koja bi mu ograničavala važenje do donošenja općeg akta (pravilnika) o unutrašnjem ustrojstvu i organizaciji rada Instituta.

U nadi da smo Vam pružili zadovoljavajući odgovor na Vaš dopis.

Primite naše iskrene pozdrave.


REKTOR
Prof.dr. Muharem Avdispahić dr.h.c.

Dokument obradio: Kenan Filipović, diplomirani-Rukovodilac Službe za pravne poslove

Dokument kontrolisao: dr. sci. Suvad Konaković- Generalni sekretar

Dostaviti:

- Orijentalni institut
- Služba za pravne poslove UNSA
- a/a

Univerzitet u Sarajevu – Obala Kulina bana 7/II, 71000 Sarajevo – Bosna i Hercegovina

Telefon: ++387(33)226-378; ++387(33)668-250 - fax: ++387(33)226-379

<http://www.unsa.ba>
email: javnost@unsa.ba



INSTITUT ZA HIDROTEHNIKU
D.D. SARAJEVO

Stjepana Tomića 1, 71000 Sarajevo, Bosna i Hercegovina

Tel./Fax.: 21 24 66 / 67; 20 79 49; P.P. 405; E-mail: heis@heis.ba
JIB: 4200608910003, Carinski broj: 200608910003, MBS: 65-02-0013-09



COOR

centar za okolišno
održivi razvoj

Centar za okolišno održivi razvoj, COOR

Stjepana Tomića 1, 71000 Sarajevo, Bosna i Hercegovina

Tel./fax: +387 33 212 466 | +387 33 207 949

E-mail: coor@coor.ba | Web: www.coor.ba |

Sarajevo, 3.3.16.

Bosna i Hercegovina
Federacija Bosne i Hercegovine
Skupština Kantona Sarajevo
Predsjedavajuća Skupštine Kantona Sarajevo
N/p. Prof. Ana Babić

Predmet: Dostava komentara na nacrt Zakona o naučnoistraživačkoj djelatnosti Kantona Sarajevo

Poštovani,

U skladu sa vašim pozivom od 5.2..2016. godine, u nastavku Vam dostavljamo komentar na nacrt Zakona o naučnoistraživačkoj djelatnosti Kantona Sarajevo.

Članovima 15-19. nacrta Zakona o naučnoistraživačkoj djelatnosti Kantona Sarajevo utvrđeni su nosioci naučnoistraživačke djelatnosti na području Kantona Sarajevo, uvjeti osnivanja naučnoistraživačkih instituta, rokovi za donošenje odluke o osnivanje..., te između ostalog i postupak provjere ispunjenosti uslova za početak rada i daljnji rad naučnoistraživačkih instituta kao ustanova i postupak upisa i brisanja iz Registra naučnoistraživačkih subjekata na području Kantona Sarajevo, koji će sukladno članu 36. stav 10. biti detaljnije definirani pravilnicima koje donosi Ministar.

Kao jedan od razloga za donošenje Zakona se navodi da je „neophodno precizirati subjekte koji se mogu baviti naučnoistraživačkom djelatnošću, uz naglasak na pravna lica koja se osnivaju izvan visokoškolske ustanove“, što je veoma pozitivno, međutim smatramo da su članom 19. Nacrta zakona postavljeni niski kriteriji odnosno uvjeti za nastavak rada subjekata koji se mogu baviti naučnoistraživačkom djelatnošću, a koji su osnovani izvan visokoškolske ustanove, kao što je uvjet najmanje 10 zaposlenika iz reda naučnoistraživačkog osoblja od kojih najmanje 30% zaposlenika sa stepenom doktora nauka i najmanje 30% zaposlenika sa stepenom magistra i odgovarajući izbor u zvanje. Smatramo da bi ovaj kriterij trebao biti pooštren na način da subjekti koji se mogu baviti naučnoistraživačkom djelatnošću moraju imati najmanje 10 zaposlenika iz reda naučnoistraživačkog osoblja, sa punim ili nepunim radnim vremenom,

od kojih najmanje 50% zaposlenika sa stepenom doktora nauka i najmanje 50% zaposlenika sa stepenom magistra i odgovarajući izbor u zvanje.

Također, iz nacrtu zakona je nejasno, obzirom da se ne spominju „druga pravna lica koja su registrirana za obavljanje naučnoistraživačke djelatnosti“, kao što je slučaj sa važećim Zakonom o naučnoistraživačkoj djelatnosti Kantona Sarajevo iz 2004. godine, već se koriste termini ustanove i instituti, pa ostaje neuređeno i nejasno da li se pod ustanovama i institutima podrazumijevaju i privredna društva registrirana za obavljanje naučnoistraživačke djelatnosti.

Molimo Vas da razmotrite mogućnost za pronalaženje prostora u nacrtu navedenog zakona kojim bi se na poseban način tretirale naučnoistraživačke ustanove koju su osnovane izvan visokoškolskih ustanova, kao što su privredna društva, koja se nizom godina bave naučnoistraživačkim radom, te kroz različite međunarodne projekte ostvaruju međunarodnu naučnu suradnju. Na ovaj način bi se približili Evropskoj uniji u smislu stvaranja uvjeta za egzistiranje i društvenu priznatost različitih oblika organizovanja naučno-istraživačkog rada, kao npr. Centara, Centara izvrsnosti kao naučnoistraživačkih subjekata, te mnogih drugi oblika uobičajenih u Evrpi, koji su osnovani van visokoškolskih ustanova, kako u Kantonu Sarajevu tako i šire.

Srdačan pozdrav,


Prof. dr. Tarik Kupusović, dipl.inž.grad.

Direktor i Predsjednik



PRILOG
JAVNOJ RASPRAVI

MARIO VUKASOVIĆ

DEMOKRATSKA FRONTA

Zastupnik u Skupštini KS

VLADA KANTONA SARAJEVO

Sarajevo, 23.02.2016.

PREDMET: AMANDMANI NA NACRT ZAKONA O NAUČNOISTRAŽIVAČKOJ DJELATNOSTI

Uvaženi Premijeru, ministri i ministrice u Vladi KS,

Dostavljam amandmane na Nacrt Zakona o naučnoistraživačkoj djelatnosti.

AMANDMAN I:

Član 8. Stav (1) glasi :

- (1) *Sredstva za podršku naučnoistraživačkoj djelatnosti u smislu ovog zakona osiguravaju se u godišnjem iznosu do 2% Budžeta Kantona te i iz drugih izvora u skladu sa zakonom.*

Navedeni stav se mijenja i glasi :

- (1) Sredstva za podršku naučnoistraživačkoj djelatnosti u smislu ovog zakona osiguravaju se u godišnjem iznosu **od najmanje 2% Budžeta Kantona** te i iz drugih izvora u skladu sa zakonom.

AMANDMAN II:

Član 8. Stav (3) glasi :

- (3) *Vlada Kantona Sarajevo (u daljnjem tekstu: Vlada), na prijedlog ministra za obrazovanje, nauku i mlade Kantona Sarajevo (u daljnjem tekstu: ministar), donosi odluku kojom se utvrđuju kriteriji za utrošak sredstava iz ovog člana.*



Navedeni stav se mijenja i glasi :

(3) *Vlada Kantona Sarajevo (u daljnjem tekstu: Vlada), na prijedlog ministra za obrazovanje, nauku i mlade Kantona Sarajevo (u daljnjem tekstu: ministar) i Savjeta za nauku, donosi odluku kojom se utvrđuju kriteriji za utrošak sredstava iz ovog člana.*

AMANDMAN III:

U članu 10. dodati novi stav (3). koji glasi :

(3) *Savjet za nauku priprema Strategiju i dostavlja ga Ministarstvu u roku od 6 mjeseci od dana imenovanja Savjeta.*

AMANDMAN IV:

Član 13. Stav (1) glasi :

(1) *Članove Savjeta za nauku imenuje ministar*

Navedeni stav se mijenja i glasi :

(1) *Članove Savjeta za nauku imenuje ministar u roku od tri mjeseca od dana stupanja na snagu Zakona*

AMANDMAN V:

Član 15. glasi :

Naučnu i istraživačku djelatnost na području Kantona obavljaju:

a) *Univerzitet u Sarajevu sa organizacionim jedinicama;*



- b) *Visokoškolske ustanove sa organizacionim jedinicama registrovane na području Kantona;*
- c) *Naučnoistraživački instituti kao ustanove registrovani na području Kantona;*
- d) *Akademsko i naučnoistraživačko osoblje upisano u Registar iz člana 19. stav (7) ovog zakona;*
- e) *Akademija nauka i umjetnosti Bosne i Hercegovine.*

Navedeni član se mijenja i glasi :

Naučnu i istraživačku djelatnost na području Kantona obavljaju:

- a) *Univerzitet u Sarajevu sa organizacionim jedinicama;*
 - b) ***Akreditovane*** *visokoškolske ustanove sa organizacionim jedinicama registrovane na području Kantona;*
 - c) *Naučnoistraživački instituti kao ustanove registrovani na području Kantona;*
 - d) *Akademsko i naučnoistraživačko osoblje upisano u Registar iz člana 19. stav (7) ovog zakona;*
 - e) *Akademija nauka i umjetnosti Bosne i Hercegovine.*
- *Potrebno je utvrditi da samo one visokoškolske ustanove koje su akreditovane spadaju pod ovaj Zakon.*

AMANDMAN VI:

Član 18. stav (1) glasi:

Odluka Skupštine o zahtjevu osnivača, mora biti donesena najkasnije u roku od šest mjeseci od dana podnošenja Ministarstvu urednog zahtjeva iz člana 16. stav (4) ovog zakona.

Navedeni član se mijenja i glasi :

*Odluka Skupštine o zahtjevu osnivača, mora biti donesena najkasnije u **roku od četiri mjeseca** od dana podnošenja Ministarstvu urednog zahtjeva iz člana 16. stav (4) ovog zakona.*



AMANDMAN VII:

U članu 30. dodaje se novi stav (6) koji glasi:

(6) Spisak priznatih publikacija koje se uzimaju kao validne prilikom izbora u naučna i istraživačka znanja utvrđuje Ministarstvo na prijedlog Savjeta za nauku.



Mario Vukasović

Broj: 139/15
Sarajevo, 29.02.2016. godine

KANTON SARAJEVO

Ministarstvo za obrazovanje, nauku i mlade Kantona Sarajevo
n/r gospodin ministar, prof.dr.Elvir Kazazović

Bosna i Hercegovina
Kantona Sarajevo
KANTON SARAJEVO
29-02-2016
PRIMLJENO
Organizaciona jedinica: []
Klasifikacija: []
Broj prijema: []

Predmet: Prijedlog na nacrt Zakona o naučno-istraživačkoj djelatnosti - dostavlja se

Poštovani gospodine ministre,

U vezi sa *Informacijom o Javnoj raspravi o nacrtu Zakona o naučnoistraživačkoj djelatnosti* (broj: 11/05-38-sl./16 dana 08.02.2016. godine) dostavljamo naš prijedlog za ugradnju u tekst nacrta Zakona o naučno-istraživačkoj djelatnosti.

Iza člana 16. dodati novi član (16a ili 17) koji glasi:

Član 16a
(Naučno-tehnološki parkovi)

- (1) Naučno-tehnološki parkovi su privredna društva čiji je cilj komercijalizacija naučnih rezultata, poticanje saradnje između naučnog i privrednog sektora, a radi podsticanja poduzetništva.**
- (2) Osnivaju se na zahtjev univerziteta ili instituta, samostalno ili u saradnji sa privrednim partnerima.**
- (3) Saglasnost za osnivanje naučno-tehnološkog parka daje Vlada Kantona Sarajevo/Skupština Kantona Sarajevo na prijedlog Savjeta za nauku.**

OBRAZLOŽENJE

Naučno-tehnološki parkovi su najbolji način za transfer nauke i tehnologije u privredni sektor. Svi zakoni o naučnoistraživačkoj djelatnosti u BiH i regionu imaju „ugradenu“ mogućnost osnivanja naučno-tehnoloških parkova. U slučaju našeg prijedloga, osnivaju ga univerziteti i instituti u skladu sa zakonom. Saglasnost za osnivanje naučno-tehnološkog parka daje Vlada Kantona Sarajevo (ili druga opcija Skupština Kantona Sarajevo) na prijedlog Savjeta za nauku.

Na ovaj način se prati stalna tendencija zemalja EU i regiona ka aplikativnoj primjeni znanja i tehnologije u cilju podizanja privredne konkurentnosti. Ako je potrebno, način osnivanja naučno-tehnoloških parkova može biti regulisano odgovarajućim pravilnikom. Privredno je društvo, što znači da ga Kanton Sarajevo nije obavezan uopće finansirati, već je kompletno finansiranje obaveza univerziteta ili instituta koji pokreće proces osnivanja naučno-tehnološkog parka.

U nadi da ćete sagledati naš konstruktivan prijedlog.

Srdačan pozdrav.



Direktor:

[Signature]
Dr. sc.Naris Pojskić
Naučni savjetnik

Re: Javna rasprava o Nacrtu zakona o plaćama i naknadama članova organa upravljanja i drugih organa institucija Kantona Sarajevo, kantonalnih javnih preduzeća i javnih ustanova čiji je osnivač Kanton Sarajevo

From : Mevlida Serdarevic <serdarevicmevlida@yahoo.com>

Fri, 12 Feb, 2016 12:54

Subject : Re: Javna rasprava o Nacrtu zakona o plaćama i naknadama članova organa upravljanja i drugih organa institucija Kantona Sarajevo, kantonalnih javnih preduzeća i javnih ustanova čiji je osnivač Kanton Sarajevo

To : Ured za kvalitet Kanton Sarajevo <uka@uk.ks.gov.ba>

Reply To : Mevlida Serdarevic <serdarevicmevlida@yahoo.com>

Asocijacija za interkulturalne aktivnosti i spašavaje nalsijeđa u BiH/AIASN-a

Poštovani!

zahvaljujemo se na blagovremeno dostavljeno materijalu. Moguće da isti nismo dovoljno pažljivo porčitali, ali ipak postavljamo slijedeće pitanje:

Poznato je da postoje privatne klinike, privatni fakulteti, privatne organizacije raznih oblika djelovnjaja koje se bave i naučno-istraživačkim radom. i sl. Za očekivati je da bi mogli postojati i privatni naučno-istraživački instituti, upravo najviše na području Kantona Sarajevo. Koliko vidimo ovaj Prednacrt se ne odnosi na privatne (eventulano osnovane ili koje će se osnovati) naučno-istraživačke institute /organizacije, jer se iz materiala to jasno ne vidi. Ako se ne odnose, kako se njihov rad regulira ili je to ostavljeno "slobodnom tržištu"

Kada je riječ o kulturi, zasigurno niti jedna od postojećih institucija koje se bave naučno-istraživačkim radom, posebno ne muzeji i arhivi neće se moći registrirati, jer zbog prirode posla imaju više od 40% osoblja koje ne spada u kategoriju naučno-istraživačkog osoblja (30% +30%). Ovo iz razloga što se radi o malim institucijama koje ujedno obavljaju usluge za javnost tak oda imaju relativno dosta takve vrste osoblja. Naravno uvijek mogu osnovati posebna institut, ali onda nema ko da obavlja ovu oblast djelatnosti zbog koje su osnovani (Primjer može biti Zemaljski muzej koji ima preko 60 zaposlenih i trebao bi prema slovu predloženog Zakona imati najmanje 30-35 doktora nauka i magistara, što je neizvodljivo. Istina kanton nije osnivač ZM, ali ovo je primjer. Slično je sa Arhivom Sarajeva, Muzejom Sarajeva i t.d.

S poštovanjem.

On Wednesday, February 10, 2016 1:16 PM, Ured za kvalitet Kanton Sarajevo <uka@uk.ks.gov.ba> wrote:

Poštovani,

U prilogu Vam dostavljamo obavještenje kako slijedi.

Ured za kvalitet

Na osnovu člana 12. stav 1. tačke b) i l) i člana 18. stav 1. tačka b) Ustava Kantona Sarajevo ("Službene novine Kantona Sarajevo", br. 1/96, 2/96 - ispravka, 3/96 - ispravka, 16/97, 14/00 i 4/01), Skupština Kantona Sarajevo, na sjednici održanoj _____ 2004. godine, donijela je

Z A K O N O NAUČNOISTRAŽIVAČKOJ DJELATNOSTI

I. OSNOVNE ODREDBE

Član 1.

Naučnoistraživačka djelatnost je od temeljnog značaja za sveukupni razvoj Kantona Sarajevo (u daljem tekstu: Kanton) u procesu stvaranja društva baziranog na znanju. Naučnoistraživačka djelatnost, zajedno sa visokim obrazovanjem, treba postati jedan od glavnih nosilaca ukupnog privrednog i društvenog razvoja. Naučnoistraživačka djelatnost, u smislu ovog zakona, obuhvata naučnoistraživački i istraživačkorazvojni rad, objavljivanje i korištenje rezultata naučnih i razvojnih istraživanja, osposobljavanje kadrova za naučnoistraživački i istraživačkorazvojni rad i usavršavanje naučnika, te održavanje i razvoj naučnoistraživačke infrastrukture.

Član 2.

Ovim zakonom se utvrđuju načela i ciljevi, interesi i potrebe u naučnoistraživačkoj djelatnosti u Kantonu, osiguravanje sredstava za podršku naučnoistraživačkoj djelatnosti od interesa za Kanton, donošenje Programa naučnoistraživačke djelatnosti u Kantonu (u daljem tekstu: PNID), formiranje Savjeta za nauku Kantona, te osnovni uvjeti i kriteriji za bavljenje naučnoistraživačkom djelatnošću.

Član 3.

Interes i potrebe Kantona u naučnoistraživačkoj djelatnosti, osiguravanje sredstava i njihovo ulaganje u naučnoistraživačku djelatnost, te druga pitanja od značaja za ovu djelatnost na području Kantona uređuju se ovim zakonom.

Član 4.

Naučnoistraživačka djelatnost podrazumijeva stvaralački rad, čiji rezultat doprinosi otkrivanju novih znanja i korištenju istih i postojećih znanja za primjene u svim oblicima ljudskog djelovanja.

Naučnoistraživačka djelatnost obuhvata fundamentalna, aplikativna i razvojna istraživanja.

Rezultati naučnoistraživačke djelatnosti moraju da sadrže elemente izvornosti i novine, a vrednuju se objavljivanjem u naučnim i stručnim časopisima, zbornicima radova sa

naučnih i stručnih skupova, monografijama i sl. ili provjerom u praksi.
Navedeno vrednovanje će biti definirano odgovarajućim pravilnikom.

Član 5.

Fundamentalno istraživanje je teorijski i eksperimentalni rad poduzet ka traženju novih spoznaja i zakonitosti.

Aplikativno istraživanje je teorijski i eksperimentalni rad usmjeren ka stjecanju novih znanja, prvenstveno radi zadovoljavanja praktičkih potreba.

Razvojno istraživanje je sistematski rad zasnovan na rezultatima fundamentalnih i aplikativnih istraživanja i iskustava, usmjeren na stvaranje novih materijala, uređaja, sistema i metoda, uključujući stvaranje novih ili bitno poboljšanje postojećih proizvoda, tehnologija, uređaja, sistema, procesa i usluga.

Član 6.

Pod osposobljavanjem kadra za naučnoistraživačku djelatnost, u smislu ovog zakona, podrazumijeva se podrška i stvaranje uvjeta za stjecanje naučnog stepena magistra i doktora nauka.

Pod usavršavanjem naučnika, podrazumijeva se stjecanje novih i proširivanje stečenih znanja, putem postdoktorskih studija i drugih oblika usavršavanja.

Član 7.

Naučnoistraživačka infrastruktura obuhvata objekte, opremu i druge slične uvjete potrebne za naučnoistraživačku djelatnost (naučnoistraživačke laboratorije, postrojenja, ispitne stanice, naučne biblioteke, naučne informacijske i informatičke službe, naučno izdavaštvo i sl.).

Član 8.

Kanton, u namjeri da doprinese porastu kvaliteta života u materijalnom i kulturnom domenu, privrednom napretku i općem razvoju, osigurava uvjete za postizanje slijedećih ciljeva:

- proširivanje naučnih saznanja;
- podsticanje upotrebe nauke za društveni razvoj;
- povećanje obima i kvaliteta naučnoistraživačke djelatnosti;
- stimuliranje naučnika i istraživača;
- podsticanja saradnje subjekata iz naučnoistraživačke djelatnosti.

Član 9.

Naučnoistraživačka djelatnost se temelji na načelima:

- odgovornosti za sveukupan privredni i društveni prosperitet;
- slobode naučnoistraživačkog i istraživačkorazvojnog rada i stvaralaštva;
- javnosti naučnoistraživačkog rada, a posebno rezultata tog rada;

- konkurentnosti naučnih programa i prijedloga;
- etike i odgovornosti naučnika i istraživača za posljedice vlastitog rada;
- povezanosti sa sistemom visokog obrazovanja;
- brige za održivi razvoj, te za zaštitu čovjekove okoline;
- međunarodne uključenosti, otvorenosti i saradnje.

II. INTERESI I POTREBE KANTONA U NAUČNOISTRAŽIVAČKOJ DJELATNOSTI

Član 10.

Interesi i potrebe Kantona u naučnoistraživačkoj djelatnosti, u smislu ovog zakona, jesu:

- definiranje i realizacija strategije razvoja nauke;
- osposobljavanje kadrova za naučnoistraživački i istraživačkorazvojni rad, odnosno uvođenje u naučni rad mlade populacije, te usavršavanje naučnika;
- razvoj postojeće i uvođenje nove naučnoistraživačke infrastrukture, kao preduvjeta za naučnoistraživački i istraživačkorazvojni rad;
- naučnoistraživački i istraživačkorazvojni projekti koji se realiziraju u saradnji subjekata iz različitih kantona, entiteta, te u okviru međunarodne saradnje;
- naučnoistraživački projekti i razvojna istraživanja čija je tematika od posebnog, odnosno šireg interesa za razvoj Kantona i države,
- stimuliranje stjecanja naučnih stepena putem međunarodne naučne saradnje.

Član 11.

Stjecanja vrhunskih naučnih stepena (doktorskih i magistarskih) u okviru međunarodne naučne saradnje i sa međunarodnim komisijama za odbranu istih predstavlja poseban interes Kantona i biće posebno definiran pravilnikom koji donosi ministar.

III. SREDSTVA ZA PODRŠKU NAUČNOISTRAŽIVAČKOJ DJELATNOSTI

Član 12.

Sredstva za podršku naučnoistraživačkim djelatnostima u smislu ovog zakona osiguravaju se u godišnjem iznosu do 2% budžeta Kantona.

Sredstva iz prethodnog stava biće utrošena u skladu s PNID-om, a 5% od izdvojenih sredstava iz stava 1. vode se kao rezervna sredstva za podršku projektima koji su od posebnog interesa za razvoj Kantona i države.

Vlada donosi posebnu odluku i kriterije za utrošak tih sredstava.

Član 13.

Sredstva iz člana 12. stav 1. ovog zakona, izuzev sredstava rezerviranih u skladu sa stavom 2. člana 12. ovog zakona, koriste se za ulaganje u osposobljavanje kadrova za

naučni i istraživački rad, te za usavršavanje naučnika, za razvoj i uvođenje nove naučnoistraživačke infrastrukture, te za poticanje naučnoistraživačkih i istraživačkorazvojnih projekata od interesa za Kanton, državu i razvoj visokog obrazovanja u skladu sa ovim zakonom.

Za namjene iz prethodnog stava sredstva se koriste putem Savjeta za nauku Kantona, koji se osniva posebnim aktom a radi pri Ministarstvu obrazovanja i nauke Kantona (u daljem tekstu: Ministarstvo).

Aktom o osnivanju Savjeta za nauku Kantona uređuju se uvjeti i način finansiranja, odnosno poticanja projekata iz stava 1. ovog člana.

IV. PROGRAM NAUČNOISTRAŽIVAČKE DJELATNOSTI KANTONA

Član 14.

Program naučnoistraživačke djelatnosti u Kantonu predstavlja osnovu za podsticanje naučnoistraživačkog i istraživačkorazvojnog rada u Kantonu.

PNID utvrđuje:

- ciljeve koji se u ovoj oblasti žele dostići na nivou Kantona;
- naučna područja i uže oblasti koje treba posebno razvijati i materijalno podržavati radi dostizanja ciljeva u razvoju Kantona i države;
- prioritete potrebe u naučnoistraživačkoj djelatnosti i prioritete ulaganja u naučnoistraživačke i istraživačkorazvojne projekte u narednom petogodišnjem periodu;
- program podrške za naučnoistraživačku infrastrukturu;
- program podrške za osposobljavanje kadra za naučnoistraživački i istraživačkorazvojni rad i za usavršavanje naučnika od interesa za Kanton;
- ostale odrednice koje su od značaja u kreiranju strategije i politike u nauci i naučnoistraživačkoj djelatnosti (period ažuriranja i redefimiranja ciljeva koji se žele doseći u narednom petogodišnjem periodu, program razvoja sistema naučnih informacija i objavljivanja dostignuća naučnoistraživačke djelatnosti, program učešća u međunarodnim naučnoistraživačkim i istraživačkorazvojnim projektima i dr.)

Član 15.

Nacrt PNID-a priprema Savjet za nauku Kantona i dostavlja ga Ministarstvu.

PNID donosi Skupština Kantona, na prijedlog Vlade Kantona.

PNID se donosi za period od pet godina, a izmjene i dopune PNID-a se vrše po postupku predviđenom za njegovo donošenje.

V. SAVJET ZA NAUKU KANTONA

Član 16.

Savjet za nauku Kantona (u daljem tekstu: Savjet) naučno je tijelo koje osigurava donošenje i provođenje PNID-a.

Član 17.

Savjet:

- ocjenjuje stanje u naučnoistraživačkoj i istraživačkorazvojnoj djelatnosti, njen položaj i razvoj sa stanovišta međunarodne konkurentnosti, kvaliteta i društvene svrsishodnosti;
- priprema nacrt PNID-a;
- razmatra prijedloge zakona i drugih propisa iz oblasti naučnoistraživačke djelatnosti koji su u funkciji osiguravanja općih uvjeta za podsticanje naučnoistraživačkog i istraživačkorazvojnog rada i upotrebe njegovih rezultata;
- daje prijedloge za uređivanje pojedinih pitanja u naučnoistraživačkoj djelatnosti, te predlaže i podstiče donošenje mjera za unapređenje te djelatnosti;
- poduzima sve aktivnosti vezane za realizaciju PNID-a (definiranje i raspisivanje konkursa, ocjene konkursnih prijava, prijedlog alokacije sredstava po oblastima i projektima i sl.);
- donosi poslovnik o svom radu;
- podnosi godišnje izvještaje o svom radu Vladi Kantona, putem Ministarstva.

Član 18.

Savjet ima ukupno devet članova, od kojih je šest iz naučnih područja kako slijedi:

- prirodne nauke;
- tehničke nauke;
- biomedicinske nauke;
- biotehničke nauke;
- društvene nauke;
- humanističke nauke.

Sedmi član je ministar obrazovanja i nauke Kantona (u daljem tekstu: ministar) po funkciji, osmi član je ministar privrede Kantona po funkciji, a deveti član je istaknuti privrednik imenovan od strane Ministarstva privrede Kantona.

Jedan od članova iz naučnih oblasti obavlja dužnost predsjednika, a jedan dužnost potpredsjednika Savjeta.

Član 19.

Članove Savjeta imenuje Vlada Kantona iz reda vrhunskih naučnika, tehnologa i privrednika, na osnovu prijedloga ministra.

Uz prijedlog za izbor članova Savjeta, predlagač je dužan za kandidate priložiti naučno-stručnu biografiju i informaciju o objavljenim radovima.

Prilikom imenovanja članova Savjeta, pored odgovarajuće zastupljenosti naučnih područja, Vlada Kantona vodi računa i o naučnim odlikama kandidata i njihovom međunarodnom ugledu.

Za predsjednika Savjeta, Vlada Kantona imenuje posebno istaknutog naučnika, sa iskustvom iz multidisciplinarnih istraživanja i sa međunarodnim referencama i iskustvom u rukovođenju institucijama naučnoistraživačke djelatnosti.

Član 20.

Članovi Savjeta biraju se na period od četiri godine, sa mogućnošću jednog ponovnog izbora.

Član 21.

Prilikom izbora članova Savjeta potrebno je voditi računa o obezbjeđivanju kontinuiteta provođenja PNID-a.

Član Savjeta može biti razriješen dužnosti i prije isteka vremena na koje je imenovan, i to:

- na vlastiti zahtjev;
- ako ne ispunjava dužnosti člana Savjeta;
- ako svojim ponašanjem povrijedi ugled Savjeta;
- ako izgubi sposobnost za obavljanje dužnosti.

Zahtjev za utvrđivanje postojanja okolnosti za razrješenje dužnosti člana Savjeta, u smislu prethodnog stava, može podnijeti predsjednik, potpredsjednik ili dva člana Savjeta.

Ako zahtjev podrži većina članova Savjeta, zahtjev se, sa odgovarajućim obrazloženjem, putem Ministarstva, dostavlja Vladi Kantona.

Član 22.

Savjet može za potrebe svog rada i realizacije zadataka, prema potrebi, angažirati ekspertni tim ili eksperte pojedince, radi stručne ocjene u pripremi pojedinih rješenja.

Član 23.

Sve stručne i administrativne poslove za potrebe Savjeta obavlja Sektor za nauku Ministarstva.

VI. NOSIOCI NAUČNOISTRAŽIVAČKE DJELATNOSTI

Član 24.

Naučnoistraživačku djelatnost obavljaju pravna i fizička lica koja ispunjavaju uvjete propisane zakonom, kao što su:

- Akademija nauka i umjetnosti BiH;
- univerziteti;
- fakulteti;
- naučnoistraživački instituti;
- druga pravna lica koja su registrirana za obavljanje naučnoistraživačke djelatnosti.

Član 25.

Naučnoistraživačku djelatnost može obavljati i fizičko lice ako ima naučno zvanje i ispunjava druge uvjete utvrđene zakonom.

Član 26.

Pravna lica za obavljanje naučnoistraživačke djelatnosti iz člana 24. ovog zakona mogu osnivati domaća i inostrana pravna i fizička lica, u svim oblicima svojine. Ako pravno lice osnivaju dva ili više osnivača, njihovi međusobni odnosi, prava, obaveze i odgovornosti uređuju se ugovorom, koji se zaključuje u pismenoj formi.

Član 27.

Pravno lice može početi sa obavljanjem naučnoistraživačke djelatnosti ako ima najmanje 20% zaposlenih sa naučnim stepenom doktora nauka i najmanje 20% zaposlenih sa naučnim stepenom magistra nauka iz odgovarajućih naučnih oblasti. Za direktora pravnog lica iz prethodnog stava može biti imenovano lice koje ima naučni stepen doktora nauka.

Član 28.

Savjet, odnosno drugo odgovarajuće stručno tijelo pravnog lica koje obavlja naučnoistraživačku djelatnost sastavljeno je od najmanje pet članova, od kojih najmanje 40% ima naučni stepen doktora nauka i najmanje 40% naučni stepen magistra nauka. U pravilu, navedeno tijelo čine članovi sa naučnim stepenom doktora nauka.

Član 29.

Ministarstvo vodi evidenciju pravnih i fizičkih lica koja obavljaju naučnoistraživačku djelatnost. Kriteriji upisa i brisanja iz evidencije, kao i oblik i sadržaj evidencije iz stava 1. ovog člana, utvrđiće se bližim propisom koji donosi ministar.

Član 30.

Ostala pitanja i uvjeti za osnivanje i početak rada pravnih lica koja obavljaju naučnoistraživačku djelatnost, kao i pitanja koja se odnose na upravljanje i rukovođenje radom pravnog lica, djelokrug rada Savjeta, odnosno drugog odgovarajućeg stručnog tijela, upis pravnog lica u odgovarajući registar, te prestanak rada pravnog lica, uređuju se Zakonom o ustanovama.

VII. NAUČNICI I ISTRAŽIVAČI

Član 31.

Naučnoistraživački odnosno istraživačkorazvojni rad obavljaju naučnici, izabrani u naučno-nastavna zvanja na univerzitetima (redovni profesori, vanredni profesori, docenti), članovi ANUBiH i drugi naučnici izabrani u naučna zvanja; istraživači izabrani

u istraživačka zvanja, saradnici izabrani na univerzitetima u zvanje višeg asistenta i asistenta i drugi istraživači izabrani u istraživačka zvanja.

Član 32.

Uslovi izbora u naučno-nastavna i saradnička zvanja na univerzitetu i angažovanja na univerzitetu definirani su važećim Zakonom o visokom obrazovanju.

Član 33.

Izbor u naučna i istraživačka zvanja kandidata koji nisu izabrani u smislu člana 32. ovog zakona vrši komisija koju imenuje Ministarstvo.

Član 34.

Komisiju iz člana 33. ovog zakona čine najmanje tri člana, od kojih su najmanje dvije trećine univerzitetski nastavnici ili članovi Akademije nauka i umjetnosti Bosne i Hercegovine, iz relevantne naučne oblasti.

Član 35.

Naučna zvanja u smislu člana 33. ovog zakona su:

- naučni saradnik;
- viši naučni saradnik;
- naučni savjetnik.

Istraživačka zvanja u smislu člana 33. ovog zakona su:

- stručni saradnik;
- viši stručni saradnik;
- stručni savjetnik.

Član 36.

Uslovi izbora u naučna i istraživačka zvanja iz člana 35. ovog zakona su slijedeći:

- Za stručnog saradnika može biti izabran kandidat koji je završio odgovarajuću VSS, dodiplomski studij, sa prosječnom ocjenom općeg uspjeha utvrđenom aktom pravnog lica koje ga angažuje.

Izbor u zvanje stručnog saradnika vrši se na vremenski period utvrđen aktom pravnog lica koje ga upošljava.

- Za višeg stručnog saradnika može biti izabrano lice koje ima naučni stepen magistra nauka ili na Univerzitetu u Sarajevu prihvaćenu temu doktorske disertacije.

Izbor u zvanje višeg stručnog saradnika vrši se na period od četiri godine.

Po isteku ovog perioda kandidat može biti ponovo biran u isto zvanje.

- Za stručnog savjetnika može biti izabrano lice koje ima najmanje dva izborna perioda predviđena u zvanju višeg stručnog saradnika i najmanje četiri vrijednosna poena sakupljena po bilo kojoj od slijedećih mogućnosti (ili njihovih kombinacija):

- objavljena knjiga ili monografija iz odgovarajuće stručne ili naučne oblasti 1 poen,
- uspješno realiziran jedan naučnoistraživački ili istraživačkorazvojni projekat strogo usklađen sa strategijom naučnog i tehnološkog razvoja Kantona i/ili BiH 2 poena.

Po isteku ovoga perioda kandidat pod istim uslovima može biti ponovno biran u isto zvanje.

- Za naučnog saradnika može biti izabrano lice koje ima naučni stepen doktora nauka i najmanje jedan rad publikovan u časopisu ili zborniku koji prati relevantna međunarodna baza podataka (npr. Current Contents, SCI . . .).

Izbor u zvanje naučnog saradnika vrši se na period od pet godina. Po isteku ovog perioda, isto lice može biti ponovno birano u isto zvanje ukoliko u proteklom periodu ima najmanje jedan rad publikovan u časopisu ili zborniku koji prati relevantna međunarodna baza podataka (npr. Current Contents, SCI...).

- Za višeg naučnog saradnika može biti izabrano lice koje ima naučni stepen doktora nauka, najmanje tri godine provedene u zvanju naučnog saradnika, najmanje tri rada publikovana u časopisima ili zbornicima koje prati relevantna međunarodna baza podataka (npr. Current Contents, SCI...) i:

- objavljenu naučnu knjigu ili monografiju iz relevantne naučne oblasti, ili
- mentorstvo jednog kandidata koji je odbranio svoj doktorski rad iz relevantne naučne oblasti, ili
- uspješno realiziran bar jedan naučnoistraživački ili istraživačkorazvojni projekat strogo usklađen sa strategijom naučnog i tehnološkog razvoja Kantona i/ili Bosne i Hercegovine.

Izbor u zvanje višeg naučnog saradnika vrši se na period od pet godina. Po isteku ovog perioda, isto lice može biti ponovno birano u isto zvanje ukoliko u proteklom periodu ima najmanje jedan rad publikovan u časopisu ili zborniku koji prati relevantna međunarodna baza podataka (npr. Current Contents, SCI...).

- Za naučnog savjetnika može biti izabrano lice koje ima naučni stepen doktora nauka, najmanje tri godine provedene u zvanju višeg naučnog saradnika, najmanje pet radova publikovanih u časopisima ili zbornicima koje prati relevantna međunarodna baza podataka (npr. Current Contents, SCI...) i najmanje četiri vrijednosna poena, skupljena po bilo kojoj od slijedećih mogućnosti, ili po njihovim kombinacijama: • objavljena naučna knjiga ili monografija iz relevantne naučne oblasti 1 poen

- mentorstvo jednog kandidata koji je odbranio svoj doktorski rad iz relevantne oblasti 1 poen
- uspješno realiziran jedan naučnoistraživački ili istraživačkorazvojni projekt, strogo usklađen sa strategijom naučnog i tehnološkog razvoja Kantona i/ili Bosne i Hercegovine 2 poena.

Naučni savjetnik se bira na period od pet godina.

Po isteku najmanje tri godine od ovog perioda isti kandidat može biti ponovno biran u isto zvanje ukoliko je u proteklom periodu publikovao bar jedan rad u časopisu ili zborniku koji prati relevantna međunarodna baza podataka (npr. Current Contents, SCI...) ili je skupio bar jedan vrijednosni poen iz ovog člana. Odlaskom u penziju, kandidat koji je do tada imao zvanje naučnog savjetnika zadržava to zvanje.

Izuzetak od prethodnih odredbi iz ovog člana čine oblasti: historije, jezika i književnosti u Bosni i Hercegovini, za koje se kao relevantni prihvataju naučni radovi objavljeni u časopisima sa međunarodnom recenzijom za sve naučne i istraživačke stepene.

Član 37.

U zavisnosti od profila svoje djelatnosti, naučnoistraživačka organizacija kao poslodavac, za izbor u naučnoistraživačka zvanja, osim uvjeta definiranih u članu 36. ovog zakona, može propisati i dodatne kriterije.

Dodatne kriterije iz stava 1. ovog člana definira Savjet za nauku te naučnoistraživačke organizacije.

Član 38.

U vremenske periode ne uračunava se vrijeme provedeno na porodijskom odsustvu, niti vrijeme provedeno na izvršavanju javne funkcije u periodu jednog mandata.

Član 39.

Licima koja su na univerzitetu, po posebnom zakonu, izabrana u nastavno zvanje redovnog ili vanrednog profesora, kao i docenta, nastavna zvanja se priznaju i za rad u naučnoistraživačkom pravnom licu.

U smislu prethodnog stava, nastavno zvanje redovnog profesora priznaje se kao naučno zvanje naučni savjetnik, vanrednog profesora kao naučno zvanje viši naučni saradnik, a docenta kao naučno zvanje naučni saradnik.

Član 40.

Naučnici i istraživači zaključuju ugovor o angažmanu sa pravnim licem koje obavlja naučnoistraživačku djelatnost, u skladu sa Zakonom o radu.

Član 41.

Daljnji angažman naučnika, odnosno istraživača koji ne bude izabran u isto ili više naučno, odnosno istraživačko zvanje, određen je pravilima, odnosno statutom pravnog lica kod kojeg je zaposlen.

Član 42.

Izbor u naučno zvanje vrši se na osnovu konkursa objavljenog u javnim glasilima. Konkurs iz stava 1. ovog člana može raspisati zainteresirano pravno lice uz saglasnost Ministarstva ili samo Ministarstvo, na osnovu zahtjeva pojedinaca zainteresiranih za stjecanje naučnog zvanja.

Član 43.

Izveštaj o prihvatanju ili neprihvatanju izbora kandidata u odgovarajuće naučno zvanje komisija iz člana 33. ovog zakona dostavlja Senatu Univerziteta u Sarajevu na potvrđivanje i o tome informira Ministarstvo.

Član 44.

Senat Univerziteta u Sarajevu je dužan najkasnije u roku od 60 dana od dana prijema izvještaja komisije dostaviti svoju saglasnost za izbor u naučno zvanje ili dostaviti obrazloženu odluku o odbijanju davanja saglasnosti. Ako univerzitet ne postupi u skladu sa prethodnim stavom ili u naznačenom roku ne zatraži dodatne podatke, Ministarstvo može potvrditi izbor.

Član 45.

Postupak izbora se smatra okončanim kada ga potvrdi nadležni organ, u smislu člana 44. ovog zakona.

Član 46.

Izbor u istraživačka zvanja vrši naučno vijeće, odnosno drugo odgovarajuće stručno tijelo pravnog lica koje obavlja naučnoistraživačku djelatnost, u skladu sa ovim zakonom i svojim pravilima, odnosno statutom.

Član 47.

Ministarstvo vodi evidenciju naučnika i istraživača sa područja Kantona. Osim evidencije naučnika i istraživača iz stava 1. ovog člana, vodi se i evidencija lica izabranih u naučno-nastavna i saradnička zvanja, koji sudjeluju u naučnoistraživačkim i istraživačkorazvojnim projektima. Sadržaj, oblik i način vođenja evidencije, te postupak upisa i brisanja iz evidencije utvrdit će se bližim propisom koji donosi ministar.

Član 48.

Ostala pitanja koja se odnose na postupak izbora u naučna i istraživačka zvanja utvrdit će se bližim propisom koji donosi ministar.

Član 49.

Provedba odredaba ovog zakona podrazumijeva striktno poštivanje odredaba Zakona o ravnopravnosti spolova Bosne i Hercegovine.

VIII. NAGRADE ZA NAUČNA DOSTIGNUĆA

Član 50.

Kanton dodjeljuje nagrade za vrhunska, odnosno za posebno značajna dostignuća u naučnoistraživačkoj djelatnosti, kao i za životno djelo. Kriteriji i postupak dodjele nagrada, kao i broj nagrada, utvrđuju se bližim propisom koji donosi ministar.

IX. NADZOR

Član 51.

Nadzor nad primjenom odredbi ovog zakona i propisa donesenih na osnovu njegovih odredbi vrši Ministarstvo.

Član 52.

Pri vršenju nadzora, u smislu člana 51. ovog zakona, nadležni organ može poništiti odluke organa ili drugih tijela kojima su pojedina pitanja riješena u suprotnosti sa odredbama ovog zakona.

X. PRIJELAZNE I ZAVRŠNE ODREDBE

Član 53.

Ministar će u roku od 30 dana od dana stupanja na snagu ovog zakona predložiti Vladi Kantona sastav Savjeta, te njegovog predsjednika i potpredsjednika. Vlada Kantona će imenovati članove prvog Savjeta u roku od 60 dana od dana primljenog prijedloga za imenovanje.

Član 54.

Savjet će pripremiti nacrt PNID-a najkasnije u roku od deset mjeseci od dana imenovanja članova Savjeta. Vlada Kantona će utvrditi prijedlog prvog PNID-a i uputiti ga na usvajanje Skupštini Kantona u roku od 30 dana nakon dostavljanja njegovog nacrtu od strane Savjeta.

Član 55.

Ministar će donijeti pravilnike iz čl. 4, 11, 13, 29, 47, 48. i 50. ovog zakona najkasnije u roku od šest mjeseci od dana stupanja na snagu ovog zakona, a to su:

- Pravilnik o vrednovanju naučnih i stručnih časopisa (član 4);
- Pravilnik o stjecanju vrhunskih naučnih stepena po osnovu međunarodne naučne saradnje (član 11);
- Akt o osnivanju Savjeta za nauku Kantona (član 13);
- Pravilnik o upisu i brisanju iz evidencije pravnih i fizičkih lica u naučnoistraživačkoj djelatnosti (član 29);
- Pravilnik o upisu i brisanju iz evidencije naučnika i istraživača sa područja Kantona (član 47);
- Pravilnik o postupku izbora u naučna i istraživačka zvanja (ukoliko se ukaže potreba), (član 48);
- Pravilnik o postupku i kriterijima za dodjelu nagrada iz naučnoistraživačke djelatnosti (član 50).

Član 56.

Naučnici i istraživači, po isteku vremena na koje su izabrani, mogu zadržati stečena naučna odnosno istraživačka zvanja najduže još jedan mandatni period definiran ovim zakonom.

Nakon perioda iz prethodnog stava, izbor u isto ili novo zvanje vrši se u skladu sa odredbama ovog zakona.

Član 57.

Ovaj zakon stupa na snagu osmog dana od dana objavljivanja u "Službenim novinama Kantona Sarajevo".

Broj: _____
Sarajevo, _____

PREDSJEDAVAJUĆA SKUPŠTINE KANTONA SARAJEVO, Meliha Alić

- b) osigurati suradnju svake osobe i svakog službenika u davanju potrebnih informacija i podataka;
 - c) osigurati pristup i kontrolu na svim mjestima gdje su osobe lišene slobode, zatvorene ili gdje rade;
 - d) omogućiti prisustvo sudskim i upravnim postupcima kao i sastancima organa.
- Nalazi i izvještaji tijela iz stava 1. ovog člana će se razmatrati u nadležnim organima po hitnom postupku, te će na osnovu toga biti preduzimate odgovarajuće mjere gdje to bude potrebno.

III - NADLEŽNOSTI KANTONA

Član 11.

Određivanje nadležnosti

Kanton ima nadležnosti utvrđene Ustavom Federacije i ovim Ustavom.

U slučaju potrebe za tumačenjem, nadležnosti Kantona utvrđene ovim Ustavom će biti tumačene u korist Kantona po principu pretpostavljene nadležnosti, a pojedinačno spomenuta ovlaštenja u ovom Ustavu se neće tumačiti kao bilo kakva ograničenja općih nadležnosti Kantona.

Član 12.

Isključive nadležnosti

U okviru svojih nadležnosti Kanton je nadležan za:

- a) uspostavljanje i nadziranje policijskih snaga;
- b) utvrđivanje obrazovne politike, uključujući donošenje propisa o obrazovanju i osiguranje obrazovanja;
- c) utvrđivanje i provođenje kulturne politike;
- d) utvrđivanje stambene politike, uključujući i donošenje propisa koji se tiču uređivanja i izgradnje stambenih objekata;
- e) utvrđivanje politike koja se tiče reguliranja i osiguravanja javnih službi;
- f) donošenje propisa o korištenju lokalnog zemljišta, uključujući i zadržavanje;
- g) donošenje propisa o unaprijeđivanju lokalnog poslovanja i dobrotvornih aktivnosti;
- h) donošenje propisa o lokalnim postrojenjima za proizvodnju energije i osiguranje njihove dostupnosti;
- i) utvrđivanje politike u vezi sa osiguranjem radija i televizije, uključujući donošenje propisa o osiguranju njihovog rada i izgradnji;
- j) provođenje socijalne politike i uspostava službi socijalne zaštite;
- k) stvaranje i primjena politike turizma i razvoja turističkih resursa;
- l) stvaranje pretpostavki za optimalni razvoj privrede koja odgovara urbanoj sredini;
- m) finansiranje djelatnosti kantonalnih vlasti ili kantonalnih agencija oporezivanjem, zaduživanjem ili drugim sredstvima.

Član 13.

Zajedničke nadležnosti sa Federacijom

Kanton zajedno sa Federacijom, samostalno ili u koordinaciji sa federalnim vlastima vrši slijedeće nadležnosti:

Član 18.

Nadležnosti Skupštine

Skupština Kantona:

- a) priprema i dvotrećinskom većinom usvaja Ustav Kantona;
- b) donosi zakone i druge propise u okviru izvršavanja nadležnosti Kantona, izuzev propisa koji su ovim Ustavom ili zakonom dati u nadležnost Vlade Kantona;
- c) bira i razrješava Predsjednika i podpredsjednika Kantona sukladno Ustavu Federacije i ovom Ustavu;
- d) utvrđuje politiku i donosi programe razvoja Kantona;
- e) potvrđuje imenovanje Premijera, zamjenika Premijera i članova Vlade Kantona;
- f) osniva kantonalne i općinske sudove i utvrđuje njihove nadležnosti;
- g) bira sudije kantonalnih sudova sukladno Ustavu Federacije i ovom Ustavu;
- h) usvaja budžet Kantona i donosi zakone o oporezivanju i na drugi način osigurava potrebno finansiranje;
- i) bira zastupnike u Dom naroda Federacije sukladno Ustavu Federacije;
- j) odlučuje o prijenosu ovlaštenja Kantona na općine i Federaciju;
- k) odobrava zaključivanje ugovora i sporazuma u oblasti međunarodnih odnosa i međunarodne suradnje;
- l) provodi istragu sukladno ovom Ustavu i posebnim propisima;
- m) vrši i druge poslove utvrđene federalnim propisima, ovim Ustavom i kantonalnim propisima.

Član 19.

Način rada Skupštine

Skupština bira predsjedavajućeg i dva njegova zamjenika iz reda izabranih poslanika.

Skupština zasijeda javno, izuzev u slučajevima kada je to predviđeno njenim poslovnikom. Izvještaji o zasjedanjima i donesenim odlukama se objavljuju u sredstvima javnog informiranja.

Način rada Skupštine bliže se uređuje poslovnikom.

Član 20.

Poslanički imunitet

Krivični postupak ili građanska parnica ne mogu biti pokrenuti protiv kantonalnog poslanika, niti kantonalni poslanik može biti zadržan u pritvoru ili kažnjen na bilo koji način zbog iznesenog mišljenja i datog glasa u Skupštini.

Član 21.

Način odlučivanja u Skupštini

U vršenju svojih nadležnosti Skupština donosi zakone, druge propise, te opće i pojedinačne akte (dalje: propisi).